

藝文志卷十

記 碑記 銘 辨

頌 令 碑文 墓誌

節孝記 壽序 誄文

捐啟 詩 歌 楹聯

靈石縣志

趙子瑗題



靈石縣志重修目錄

圖考

星野圖 縣境圖 縣城圖 學宮圖 縣署圖 巡檢署

圖 八景圖 靈石圖說 全縣區村詳圖

地輿志卷一

沿革 分野 疆域 山川附水利 風俗

建置志卷二

城池 縣治 坊表 橋梁 里甲內村莊 市集

食貨志卷三

田賦 戶口 倉儲 權稅 鹽法 物產

學校志卷四

學宮 祭儀 樂章 祭器 書籍 學署 學額 教育

典禮志卷五

祠廟 附祀典

壇壝

郵政

武備志卷六

營伍

關隘 附堡寨墩

軍器

郵政

舖遞

職官志卷七

知縣 縣丞

教諭

訓導

巡檢

典史

驛丞

武職

輔政職員

官績

選舉志卷八

進士 舉人

孝廉方正

貢生

恩拔副優歲

武進士

武舉

省縣選舉

學校畢業

仕籍

候選

職銜 議叙

封典

人物志卷九

忠孝 善行 列女 捐賑

藝文志卷十

記 碑記 銘 辨 頌 令 碑文 墓誌 節孝記  
壽序 誄文 捐啟 詩 歌 楹聯

古蹟志卷十一

名勝 寺觀 邱墓

雜錄志卷十二

祥異 災異 事考 仙釋 礦產 建設 機關 區村  
制 農事諺語 捐修志書

靈石縣志原目錄

圖考

星野圖  
縣署圖

縣境圖  
巡檢署圖

縣城圖  
八景圖

學宮圖

地輿志卷一

沿革

分野

疆域

山川

附水利

風俗

建置志卷二

城池

縣治

坊表

橋梁

里中

內村庄

市集

食貨志卷三

田賦

戶口

倉儲

權稅

鹽法

物產

學校志卷四

學宮

祭儀

樂章

祭器

書籍

學署

學額

典禮志卷五

祠廟

附祀典

壇壝

郵政

武備志卷六

營伍

關隘

堡寨墩附軍器

郵政

舖遞

職官志卷七

知縣

縣丞

教諭

訓導

巡檢

典史

驛丞

武職

宦績

選舉志卷八

進士

舉人

孝廉方正

貢生

恩拔副歲

武進士

武

舉

仕籍

候選

職銜

議叙

封典

人物志卷九

忠孝

善行

捐賑

列女

古蹟志卷十

名勝

寺觀

邱墓

藝文志卷十一

記詩

雜錄志卷十二

祥異 事考 仙釋



輿石縣志卷之十

藝文志

藝文之有志昉自蘭臺徵獻徵文史家不廢夫萃山川之靈  
異發而爲賢豪蔚而爲忠孝後先輝映所謂獻也或顯微闡  
幽傳諸典冊懷古念舊宏我漢京所謂文也矧際我

朝文治之隆即在僻壤荒陬士之沐浴於

教澤者行見爭自濯磨蒸蒸日上矣靈雖彈丸英奇輩出而名  
山勝水又足以供高人墨客之流連而舒嘯焉載觀唐宋以  
來文獻固足徵也志藝文

記

唐河東節度觀察等使光祿大夫檢校司徒兼太原尹北都

留守御史大夫上柱國太原郡開國公食邑二千戶王宰

開成五年自隴州防禦使拜工部尙書節制邠寧至會昌三年蒙

恩換許昌節至九月自許昌統當軍驍卒洎河陽義成宣武浙西

宣歙等軍兵馬充攻討使誅除壺關寇嗣至四年八月十日梟逆

首獻闕下蒙恩獎寵除左僕射至九月將歸許昌軍次溫縣大使

持節至又授寵詔遷鎮北門十月過此至會昌六年上登寶位蒙

恩加司空至大中元年奏以雲蔚朔三州之腹爲賊喉要故戍舊

封多所廢缺蕃寇奔突無所限礙又相厭土濃壤可出軍需遂疏

其利宜請立耕戰三城募卒六千任其事務農習戰永斥邊寇克

富軍儲至二年九月秋成境肅上錄其功詔就拜司徒宰以叨乘

微劾祇寄北都及今五稔日懼罪悔靡遑非據遂瀝誠拜章乞覲  
明庭旣蒙恩下允誠懇至十二月十二日遂得祇詔擁節趨闕赴  
正仗朝聘之禮至明年正月十一日又蒙聖旨獎加光祿大夫依  
前檢校司徒却歸本鎮至二月五日過此因覽其重巒複疊積樹  
叅差汾水迴奔而潺湲天險蔽抱而崇固可壯夫畫圖皇業萬代  
之基駐旆關亭吟睇移景又觀中令河東公及相國令狐公左揆  
狄公相國崔公來罷之題列遂輒紀其轉歷及往復所自云  
從弟節度判官殿中侍御史內供奉賜緋魚袋坤

男前叅司禦錄事叅軍嗣宗並從行

河東節度高壁鎮新建通濟橋記

蘭蕭 琪  
陵

粵茲雄鎮實河東軍之要津封接蒲城當舜夏墟之舊地有關曰  
陰地有亭曰鴈歸固晉川之一隅通汾水之千派金城洶湧林麓

森沉東控介巒西連白壁峯巔萬仞壁峭千尋足食足兵有威有固則代郡鴈門何越之有至若驛騎星馳華軒雲湊往返駢闐者皆中朝名士悉息駕於鴈歸亭未嘗不題藻句紀年代也西南松門洞豁逕通千里巖巘隱映用輸礮者居焉 暝遺運者衆混流箭激不可渡之雖有葉舟過者懷疑或覆衝谿人或駐滯遊子凡經渡者咸有咨憤之詞伏會兵馬使清河張公領是鎮初有關城居人百姓等偕詣柳營請叛建長橋以導達津阻公挺備人表導全禮樂器兼經濟才爲時生深惻隱運良籌允所陳而召節級僉曰吾北離旌檠南過斯軍致舟車不便衆有感容胡爲關河字人遂請當鎮咸通觀音院主法大德普安激勸乃輩結聚 鳧兼自減月俸以咸通九年戊子歲五月九日興良工政 畢能乘時逐便因利出材勉爲甘言賞勵短匠不日畢成是橋長一百尺闊

一丈五尺下去水四十尺，規置門屋，立鏤鑰安華表柱，俾闡者潔  
嚴掌轄，著其名曰通濟。其橋南有古之曾氏石橋，雖名揚寰海而  
通濟之義莫大茲也。由是自華亭鬪虹樑，飛鵲脚架雲棧，迴朱檻  
化蟠螭於洪波，騰華鶴於朱戶，炳煥方面，蓋以壯皇家天外北門  
之咽扼耳。曩者亭際中流，有怪石蹙浪聲，砰轟若雷霆震而不息。  
兩堤人不辨其音狀，有蛟螭潛處，其下居者嘗虞罕窺其禎咎。公  
以建橋之日，奠餼酒祝之，其聲頓止。是規風振俗，兆應昭彰。  
故得磊落妖聲，潛殄水府，以表我公之勲業。巍巍乎愚才非敏達  
得不紀，茲殊績輒綴斯文，用刊貞石。是十五年壬辰四月十五日  
記

重修漢淮陰侯廟記

元集賢學士歸陽

靈石南二十里有廟祀漢淮陰侯，廟巋然踞道上，南北過者多入

謁至正庚子夏前陝西諸道行御史臺中丞某河南行書叅知政事某過而謁焉懲其久不治日入於壞各出私錢付縣主者重修之侯漢佐命臣也有大功世咸思之故祀之也侯之功在漢漢祀之可也夫何祀之今尊有德貴有功古與今一也侯之功可貴也貴之斯祀之矣又因以爲勸非有私於侯也世之稱侯者類曰善戰吾以爲不知侯夫善戰者以殺人爲功者也殺人爲功者庸可祀乎殺人而祀之是率天下以殺人也方項羽去咸陽歸彭城也諸侯皆其所樹置天下莫強焉高帝失職王漢中崎嶇山谷間栖栖然如遷人爾天下之勢以爲在項王者什九侯一起爲將漢遂爲雄拜而上坐從容數十百語而項王之爲人與其所以亡及漢之所以取楚者莫不具漢卒用以帝四海其得與張留侯蕭相國號三人傑識者以爲在此不獨以其戰也天下不爲漢則項王帝

項王帝則生民之禍未有所息也有功於漢亦有功於天下也有  
功於天下者可無祀乎或曰侯以大逆死功固不足以盡之矣雖  
不祀亦可也夫天下之所知者侯之功也其罪則漢獨知之漢知  
之而天下不知孰明其爲誣也天下公論之所在也淮南王布亦  
有功於天下者也未聞有祀之者以其反也反而祀之則亂臣接  
迹矣靈石之有廟何也侯所經也靈石者自漢適趙之道也侯嘗  
王齊與楚矣而本侯之功者史所稱也且言祀侯者以其功不以  
其爵也廟始金明昌大德嘗增葺之聞有故記石勒而文不屬所  
可見者如此也

重修河東公祠記

都御史吳 珉 邑人

靈石邑城西去一舍許里曰子夏里之南有廟一所像大賢卜子  
夏於中里人春秋祀之歲久寢壞宏治癸亥春義官牛寧屈達里

望族也慨然欲修治先出已資以倡尙義者衆皆樂捐施恐後未幾百費咸備乃擇工匠興作自正殿及兩廡牆垣朽者易頽者補弊者繪缺者增重祀河東公子夏於中仍於庭之中央建樓三楹祭享之日伶人奏樂於上以和神人門垣旣崇啓閉有鑰牧豎樵子不得遊嬉於內遠近瞻望廟貌森嚴金碧輝映煥然一新工旣畢寧介其姻友司訓張君廷器詣學請予記之按史記李克言魏成東得卜子夏文侯師事之通志記寓賢子夏晚年退居西河教授後世因追封河東公墓在河津縣書院在汾州祠有五一在靈石子夏里蓋魏都安邑靈石亦魏地也當時遊西河亦嘗經此後人思其教榮其過故立祀名里示不忘也夫聖賢之教扶持人紀功在萬世有天下國家者隆尊崇報祀之典固所宜也而窮鄉僻地亦能敬仰休風而思祀之可見吾儒之道灌溉於人心者曷嘗



有間哉雖然予復有告焉立祠祀賢固感其教矣苟感其教而不  
淑諸身則亦徒感耳必也於集衆釋奠之時觀其像則其教可思  
思其教必驗諸躬吾里之人果敦孝弟乎果崇禮誾乎務謹其所  
已能而勉其所不足俾霽然仁孝之俗興則立祠之本意得矣若  
徒爲觀美玩樂之所則反爲藝焉已耳尙其念哉是爲序

重修義勇武安王廟記

邑令白 夏穎川

王祠徧寰宇而吾治靈石祠之者廣且偉王家世河東茲邦爲桑  
梓近地意當年經寓必多雖千載後其英爽猶戀戀也縣南二十  
五里郭家溝橋北舊有祠靈享異諸方民有事必禱禱輒應然因  
就相承未底崇極而基址偏側湫隘民庶囂雜甚非所以妥神靈  
愜人意也且橋亦歲久傾欹行人病涉萬歷乙亥致仕良鄉典史  
王公慶新任長安典史石萬良耆民張朝用等請諸當道易橋木

以磚石堅實完固再鑿弔橋於要衝用遏賊因并議王祠不稱乃  
審曲面勢擴益舊址斬北山數十武前高王殿三楹抱廈如之後  
依山寢宮無梁殿亦三楹俱繞以垣牆護以欄楯廣前隙地爲屏  
蔽前再爲磚牌坊三空題其上曰天險橋橋之西另穿土空以居  
焚修者規模衍敞體制恢宏黝堊丹漆煥然炳耀落成而祭人心  
慰暢公慶等復叩縣堂請記余唯忠義立人之大節論將者必本  
諸此而勇力不與焉王之名著當時聞後世雖老夫孺子談三國  
之事者皆踴躍歡欣以爲王助然不過稱其英雄善戰力敵萬人  
耳此不足以知我王也方漢之季四海鼎沸羣雄角逐其聲震蕩  
如袁曹孫呂之輩皆霸據一方彼徼功名圖富貴者孰肯去強就  
弱舍安即危哉乃王則委質昭烈左右周旋稠人廣衆中亦侍立  
終日屢至危迫而忠義愈奮誠有見於天下者漢之天下漢政雖

不綱而昭烈固帝室之胄也輔之則足芟刈羣雄匡復漢業自河東道樓桑即傾心昭烈蓋於順逆之理去就之義已籌之審矣其乘勢犯分崛起陸梁者王視之眞鬼蜮耳肯爲之屈乎王在下邳嘗見獲於操操特加禮遇厚結其心而王恬不爲動每以受劉厚恩爲言一顯其功報書而去操深義之以操之雄猜陰忮海內鉅人若楊孔袁禰輩咸不免於誅夷惟不敢加無禮於王任其去熟視而不追固忠義大節有以折服其心也而其時昭烈方孤窮奔走羈困無聊王獨冒艱危求故主有死無二古人謂士窮乃見節義此其心豈反覆市利者可同日語耶及其守荊州攻曹仁降于禁戮龐德威聲赫奕華夏震驚吳魏君臣畏懼之不遑遂相與謀襲荊州而王之父子竟以致命當是時王不死則荊州可以無失荊州不失則中原可以坐復中原復則操不得以挾天子權不得

以據江東炎漢之燼雖冷猶熾也乃天不祚漢卒使呂蒙之計行而荊州失守王業偏安信非人力所能爲者王如彼何且荊州漢之士宇也荊州旣爲漢之士宇則昭烈可有而孫權不可爭也非可爭而爭之權一賊耳知權之爭荊州爲賊則知王之守荊州爲忠忠昭烈即所以忠漢而忠義大節有皎如日月者王亦何負於漢乎評往事者好以成敗論英雄謂拒婚東吳王之所以取敗固矣夫俗儒論史也孫權陽順陰逆其處心積慮未嘗一日忘荊州以妹聘昭烈而意在荊州於母且相爲欺隱尙何有於子之一婦翁也奸深鄙劣王素薄其人肯少從其請耶從其請而兒女私情微有牽制則忠義大節將有不自於天下者王豈爲是哉王之勛名在史冊遺烈在人心千百世凜凜猶有生氣而吾靈石之民則樂慕忠義有出天性而非強者顧祀之者非昭烈並坐則淫祠溷

淆僭妄褻誣恐神之有不妥也惟此祠幽深源遠兩山峭拔數百丈而川流其下迅急淵深山川包絡廟貌巍峨其地勝故其神靈既成而來觀者數千人過客旅人莫不駐馬入謁致敬而去雖縉紳祭之不爲諂雖市井祭之不爲僭而香火之盛將有大通於三晉者是役也經始於萬歷乙亥八月告竣於丙子十月財不稱費人不病勞余既紀其歲月而復扁其門曰鎮安天險且以冀王之陰庇一方云

重修廟學記

河南左布政 孔天允

汾州人

學校爲治首務是以先王重之所以重天下之本也靈石有縣縣有學未究厥始歲久傾頽再經水患廟制既傾學宮亦然非所以崇明祀育賢才也潁川白侯萬歷甲戌尹靈石比下車蒞學謁廟登明倫堂觀舍宇大歉於懷慨然欲一新之遽未能越明年政通

人和節量儲積乃集諸生而語之曰廟廷禮樂之宗學校風化之本二者交敝政焉出誠有司責也於是奉上德意庀財經費擇日鳩工以有爲者董其役凡殿廡宮牆多方繪飾啟聖祠戟門櫺星泮池庖湍重加變易改觀若明倫堂敬一亭兩齋則緣舊址新復恢而拓之芹宮旁復鼎建二祠左曰名宦右曰鄉賢又以餘功製二樓於學宮東南隅曰文昌曰魁星以爲諸生文明之助皆大書華扁以聳奇觀皆有裨於士類者也且釐正器數百物具備難以枚舉至於所需之物隨用隨處其間或拓舊基或加新飾或易棟梁或施營砌高下有倫廣狹相準足侈前規而垂後規金碧掩映丹堊交輝煥然炳然而廟學之制爲之一新由是師生相與周旋雍容於道義之門春秋報祀亦將駿奔對越聿起夫明禋之敬每月朔望掣講以驗勤惰休日考課第又行而上下之人材自此而

興科目以之而盛風移俗易士習亦端伊誰之功與是役也甫再  
月餘厥功就緒民不知勞財不告費非才識卓犖區畫有方曷以  
臻茲侯其知務者哉時邑博桑君李君命諸生裴郁劉暘田一成  
王化李楠走余請爲記余素聞白侯之賢且羨作邑之有道也故  
不辭聞諸禮曰君子如欲化民成俗其必由學乎又曰建國君民  
教學爲先孟子論王道之成而曰謹庠序之教我太祖高皇帝以  
六事責有司亦以學校次農桑蓋教養二者雖切於民教化尤重  
俗吏不知而視如傳舍此致治不足稱也已白侯之令靈石篤意  
愛民處官如家多卓異之績受知上官褒加之典翕如矣乃惓惓  
於興學校明教化以體先王重本之意固其所也嗟呼爾多士知  
侯修學之績抑知侯修學之心乎蓋學也者學爲聖賢而已聖賢  
之學心學也道德以爲之地忠信以爲之基仁以爲之宅義以爲路

禮以爲門廉恥以爲垣牆六經以爲戶牖昔我文清公薛氏奮跡堯舜之鄉爲一代心學之最以致知爲入門以踐履爲實地明經適用學至樂地爲今世眞儒配食廟庭是能遊聖人之門而上繼堯舜之統於不絕者也士惟自修其學廣居吾居焉正位吾立焉大道吾行焉則聖賢之堂奧可登而宗廟之美百官之富可觀庶無負於國家建學之意有司修學之心也若徒以詞章絢吾心以利祿媒吾志覬覦於趙孟晉楚之門是曠安宅而舍正路圮基壞垣依聖賢之門戶以爲奸是朝廷立之而爲士者傾之有司修之而爲士者壞之竊不爲多士取也爾多士其早辨之哉

潔惠侯龕碑記

知府趙

納

孝義人

潔惠侯祠祠有周晉高士介子也潔惠侯蓋宋元豐時所錫謚爵云祠在介山之麓卽先生與母偕隱處於乎先生高潔古介尙之



而寒食遺思尤密邇鄉縣嘉靖甲寅春余走謁於祠下酬生平之  
景仰滌暫時之塵容挹生氣於千載之前起良心於感慨之下有  
激廉奮懦超然而獨立者會介人趙廷會氏以祈雨應修龕祠中  
同郭廷周氏屬余文以紀歲月余惟世之論先生者皆高其義於  
既隱之日而不知原其心於方隱之時則於先生嘗有遺論焉夫  
先生從亡晉文公十有九年及其歸國始逃遁於綿以死致身多  
難之秋退身功成之後既不居夫寵利又何顧於聲譽棲迹山川  
之阿抗志霄漢之上羞貪盜而不伍遠爵祿其如污蓋普室諸臣  
莫高於先生者矣彼爲龍蛇之章者是徒以小人之腹度君子之  
心也悲夫是故寧慷慨以殺身從容以就義豈敢委過於君實惡  
苟同於世矧君臣之義未始先逃子母之倫終不後失齊死生於  
一瞬渺天地而委之非據矯亢以上人豈徒溝壑以爲志假先以

隱爲志則便於已而無益於時若終謂仕爲通則利於世而或枉乎已惟先生之出處兩無負焉想其從亡在外則已囂然有山林之思及乎身隱奉親則固悠然無悶悔之意嗚呼賢哉達人高尚何容易知世無孔子孰知夷齊之不怨哉然則先生雖自以爲出怨言吾謂其心之不怨也即使當時祿及猶將隱焉不祿而去其所以不潔其名乎不然有母勸之有君求之旣爲祿不及而去也胡不爲祿及之而求也由此觀之可以知其爲人矣乃若生而無祿死而爵之恐亦非先生本意但前朝事典未容輕言於是爲之銘曰於惟先生遭國多難擇君從之艱危匪憚君旣定宅義不居功國事有託身隱將終豈爲懷怨甘此投林惜哉從者不辨其心舉世醉濁獨爾醒清氣高千古無論死生仰止高山白雲遠舉我思哲人徒勞延佇永言寫心爰風高蹈庶幾秉彝獲茲同好

重修郭家溝橋記

河東僉事 辛 珍 耀州人

橋在韓侯嶺之南常家山之北各五里去府治二百餘里是爲燕  
冀之衝秦蜀之經也玉溪王先生曰宜紀其成勒石詔遠近溪張  
先生曰兪匪作孰則匪載孰傳易世而化遷聲物泯矣茲遠矣乎  
泗命靈石尹稍騰漢狀若興廢建治之由稍亦素佩先生之烈喜  
而附狀於珍以紀之珍拜手謹按狀云二山密相聯比而溝夾焉  
崔巍截出與太行相參固亦太行之脉也歲雨集則繩山及衆壑  
之水瀕洞奔趨日浚歲深遂益埳窪是故兩坂峻倚通乎底極高  
深甲於晉甸陟降於茲者輪蹄丸駛靡不驚眩而憂僵蹶也况陰  
雨則潭澍滑澆寒澗則崇巖蔽景積雪堅凝者哉此亦晉途之至  
險也珍自秦遊燕如所陳蓋備嘗矣橋於古昔不可稽國朝正統  
間有內臣郭其民者奉命出此閱茲險艱奏調府所轄郡邑僉丁

糴事可謂曠舉矣顧成而復圯豈謀非其人將大水時醫非人謀可盡抑氣運有數默有待然也姑合草構已百二十餘年於茲矣乃嘉靖元祀壬午御史王公秀守巡馬公卿金公鯉秦公偉府守廖公紀後先繼至聿求厥成飭其縣尉紀經以總理董率之司擇其民李琦劉伯純僧張海峯以募四方之財發粟以補食取燬以俾用於是羣工協力斲石常冢山之阿輦材汾水之曲而甬甌輦輒綆統菽粟之類亦以時庀於是砥其塘以壯基邪其旁以殺水之勢導之汾以爲水之歸水洩則制備矣旣而於北厓南面構關王行祠兩楹所以報神休而資默相也夫人謀旣協鬼神其依足以與坤靈並運矣珍曰不奪民財天下之善財也不廢農時天下之善力也因民之所利而利之天下之善勸也夫是舉也財以千百計而民不知力以千百計而衆不擾勞及四年不可謂不久且

甚也而百姓不以爲怨其術云何亦諸君子處置宜而三善備焉  
然諸公往矣先生碑而其人始傳諸公聞之必有大是功者王先  
生名溱家世開州登辛未進士嘗於府北郊高河之上作公濟橋  
其功倍之公濟其字也其興功濟物夷險亨屯類如此張先生名  
相字子良臨清人以丙戌進士推是府克弼庶績云前推府喬公  
年霍守宇文鏞者則首事時贊襄者也

### 新建文昌閣記

工部主事 王國楨 安邑人

庚子之秋七月余北上假道靈石入其境黎民相恬以愉鼓腹擊  
壤其簡樸勤儉有蟋蟀之風焉將入闈學博先生乃率諸俊彥揖  
余似有所吐旣就館則色喜而言曰敝邑之巽地霍山之麓形勢  
巉岩蔚乎蒼蒼風氣鍾焉我公瞻顧人文捐俸銀若干建閣於其  
上崇祀 文昌以恢一時之勝覽以開千古之文明是不可以無

記也余唯唯三嘆曰於都哉我公之澤乎公燕趙名產連步子丑之科海內山斗筮仕吾邑安邑真心寬政允稱豈弟父母作人而譽髦攸興一時桃李芬芬辛甲魁解辰未甲第斌斌最隆愛民而億兆見依救災恤患屏刑薄賦迄今棠陰之思且益永也言未已而我公邀拜於是閣之上則見地宇宏闊規制爽朗四門頓起八窓玲瓏棟宇如鳥革之峻起簷阿擬翬飛之軒翔盤桓四顧其壁立萬仞而巋然於風塵之上者恍高賢之峻絕一望無際而瑩徹於清虛之表者宛達人之空洞金碧輝煌而燦朗於人之心目者藹文章之富美冷泉關其前如金湯之四塞而固者足興鎖鑰之思汾水環其下而洶湧如萬馬之奔者殊壯直前之氣美哉茲地其因我公茲舉而益重乎然祠之有取於文昌者何考之天文文昌麗光九霄彰化六宇圖書之府其所司焉我公身先教化兩地

文翁醇醇乎日與二三子設俎豆言詩書所在著樸棫菁莪之化  
景風扇物鬱舒蟄奮當必有名賢接踵相望於旂常鍾鼎之間遠  
之追踪裴狄溫潞近之比肩周韓楊薛以潤色當代則 文昌之  
靈我公之德赫於穹壤垂於金石將肖合矣然則是閣之建是徒  
然哉公姓路字應治別號養虛余王姓國楨其名也蓋與公有世  
講之誼云

重修冷泉關記

邑令 沈復禮

仁和

國家分土畫疆莫不因形勝郡邑天下且因地設險以固吾圉故  
邊陲晏如而海內又安成祖建都北平山西平陽爲畿輔右翼而  
靈石之冷泉關尤捍衛平陽之重地也承平日久邊備稍弛隆慶  
丁卯之警寇躡內地冷泉失守而汾霍之間戎馬生郊畿輔幾至  
動搖則冷泉不但爲平陽重且爲畿輔重矣萬歷甲戌改汾州爲

府而靈石隸焉冷泉無守而平陽之門戶撤有識者憂之越二十  
年而襄陵李都諫公深鑒往事念切維桑上封事直陳冷泉爲平  
陽鎖鑰剖決利害分析機宜不啻列眉指掌上可其議於是平陽  
有靈石如故然關之城垣樓雉日就傾敗險何足恃適余承乏爲  
令曷敢不爲綢繆計稽往牒嘉靖終有修葺之役府檄霍隰洪趙  
八州縣協其工貲夫役派之民戶余申議上台發廩粟藏金鳩工  
庀材畚鍾之役計工予值與圻斲者埒無不樂趨事者日率尉劉  
巡檢沈程度而指受之增建官舍六角樓二壁壘陴堞視昔固麗  
有加始於丁巳三月六日迨五月之晦甫兩月而竣費白鏹十有  
三金粟一百七十三石不勞民擾隣而幸以集事天險屹然庶幾  
哉一人當之萬夫莫開也雖然設險以待暴客古有明訓若恃險  
而忘民隱司牧之謂何余碌碌無狀有愧西河不能無望於嗣守



者之保障也謹勒貞珉用俟來茲

靈石縣新城記

邑令申嘉言

安化人

隆慶戊辰八月靈石新城成靈石漢介休域也隋文帝幸太原開道獲瑞石有文曰大道永吉因以置縣隸汾州唐宋遼金相仍元改屬霍州國朝因之實平陽之屏蔽諸路之咽喉予承乏之年時嘉靖乙丑冬也初任諸務墜弛公署半頽百度咸廢其城垣單薄上不能正履下塹以涇圯不堪爲衛方以民窮爲憂遽難勞費凡百以三年計不意元年北虜猖獗其酋俺達黃台吉挿台吉恰石吉襖兒都司倒狼土木委兀兒永邵部慎擺腰哈喇大舉入寇由興嵐崞縣直犯靈石逼霍州以窺平陽汾屬一帶殺擄無算破石州屠其城其爲殘毒百年未有之變也靈石以預防幸免大營當事者不歸咎於人直以城垣不治爲罪信牒迫督築鑿之役急如

星火予不得已僉丁夫慎財用大加修築經營調度不遺餘力料理周詳爲久恃無恐之計當時責委分任屬工者趙楠郭希政劉廷榮王本楊思禹又極一時之選章程既備功課攸明心各奮勵靡不殫竭効力期圖永久由是財用無費城成堅厚高深外落增築完固巖然爲河東保障念予值此勞苦萬狀兼衝煩東奔西馳日不暇給厚本抑末生養休息安集勞來凡可以厚民生而固邦本者無不盡心以爲之比報政之年料丁壯繕甲兵制器械修堡砦防要害節勞役省妄費練兵積穀前此壞亂不修廢墜不舉者亦次第其咸理回視吾邑雖未及禮義之區而民殷物阜亦庶幾爲河東諸郡倚重焉謹記

重修韓侯廟記

邑令

張學洙

三原人

侯之功偉矣廟食固宜然則曷爲而在靈石縣也或者曰侯實葬

此余竊見遺塚歸然而史冊無徵或者曰侯實經此而儲胥何地志乘闕焉勿載是二說也余俱勿深論當夫劉項爭衡之際勢如逐鹿高帝故畏項天授楚方將以漢中老何暇計及天下哉設侯而事楚楚未必不得天下設侯而不事漢漢未必得天下楚得天下是以暴易暴也漢不能得天下是天未厭亂也羣雄狡逞殺伐相尋生民之禍尙忍言與自侯一起爲將拜而上坐從容數十百語而楚漢之興亡如在目睫間垓下一戰卒定漢鼎嗚呼侯之功眞與日月爭光矣千百世下猶利賴之豈特爲漢哉靈石爲晉陽咽喉亂山絕阜綿亘百餘里據險扼要乃必爭之地也當爾時烽火絡繹士馬蹂躪廬舍人民蕩然蓋父老苦兵革久矣一人御宇四海宴然夫孰使我免鋒鏑而事耰鋤百室歌盈止者非侯之力也耶夫孰使我出水火而登衽席奕世慶似續者非侯之德也耶

生成之感中於人心知必有家尸而戶祝者奈何未央之冤啣恨千古後之人思之慕之又從而悲痛之爰因荒塚而立廟以祀此三代直道之遺寧獨於靈民有異耶而又何疑焉廟昉於金明昌間自元迄今重修者三而歲月滋深漸就傾圮癸未夏六月余有宰是邑之命適明大中丞節鉞移旆瀕行進余而言曰靈邑韓侯廟踞南嶺之巔嶺以廟名路當孔道凡輶軒往來咸瞻禮焉今棟榱崩拆其何以妥神靈而肅觀瞻夫防修先賢名臣祠墓亦守土之責也爾其誌之下車三閱月政事粗舉敬謁侯廟集里中耆老而咨詢之孰者應葺孰者應增孰者應改置區畫已定先是解州刺史賢裔言公前署縣事鹽官陳公先後捐清俸付住持而邑中好義者亦踴躍樂輸遂鳩工庀材刻期竣事而廟貌巍峨侯之生氣勃勃矣是役也大殿與西窰房仍其舊而新之戲樓因其址而

廓大之增軒楹一東窰房三鐘鼓樓各二又茶房三間檻欄階級  
煥乎一新經始於乾隆二十九年二月二十六日落成於乾隆二  
十九年六月二十九日董事人里老吳世恩趙守忠等住持則僧  
人通智之師也因邑人丐余言是爲記

### 遊介林記

梁密齡  
蘭谿人

余聞介林久矣或謂予推遜跡處非靈石之介林皆不必深辨丁  
亥春遊於靜昇王氏之別業登樓遙矚見東山之麓蔚然深秀主  
人告予曰此介林也越月歸自太原忽聞時鳥變聲嚶鳴求友興  
不可更遏命童子策二衛來喜其鈍步得以悉一方之勝由村南  
過王公橋對岸小山亦起伏有致萬樹撐霄春流競發其地多榆  
間以桃柳春色更佳已稍迤折而東望介林若片雲映於山足去  
河漸遠行二三里許則水隨蹇足潺潺然心與俱清矣稻田數十

畝泉流灌溉漠漠水田飛白鷺之句彷彿可思距村已十里許北望市井咫尺仙凡介林則參差濃淡樓殿依稀令人見二米冢法綿峯撲面而來雄秀領諸山如兒孫近村名張嵩村溪透屋舍林外崗巒皆羅列掩映不可缺亦不可補造物之安排耶目之所見以爲然耶此時林亦望余然在遠近有無間可望不可即者渡數曲始及山門其中惟柏參天不知幾千百萬株間有雜樹皆石間攫拏而出石大者如獸怒蹲如人對奕微影在地天光自樹隙中射落回顧童子面有碧色予曰紅杏倚雲綠茸鋪地視此真俗不可奈耳地勢漸起聞簷鈴聲更數十武入祠瞻拜規模宏敞近人題贊頗多余亦得三絕其一云一炬燎原計太粗仙踪不逐野雲孤亡人受過侯應戚漫詡綿田勝霸圖後殿爲介母祠介弟介妹侍焉昔晉陽傅青主與予外氏祖胡公來題其楹曰承顏堂即自

取壁上功隱承顏之句又云婉容分到牡丹頭里人描污僅存故  
跡矣兩堦牡丹數枝相傳其根株甚繁每歲必有白花放於枝巔  
里人以爲神修葺之餘摧折殆盡童子曰豈以富貴非公願故並  
此花鋤之耶至堂東地勢轉高有亭三楹瞥見諸峯高下顧盼几  
席老柏森然拱侍於牆外翠色濃陰滿人襟袖介林佳處以此爲  
最余得捐塵累坐此琴書數年必有所得此則余之有志未逮者  
也出門曠視百里內山川曲折燎如指掌回首烟嵐徘徊不忍去  
邑人囑余曰當亟往來於此嗟呼余風塵中人果能亟往來於此  
乎天下名勝之區多矣樂遊者遊或不可常得否則非見其無可  
樂即以爲無足奇或又曰吾眞能遊者不必在耳目間也嗟乎造  
物鍾靈之處固不欲斯人之塵溷也於人乎何尤

淮陰侯墓記

鄒學曾  
曲沃人

淮陰侯事漢高帝帝北征豨侯遭未央之變首函送代適帝返兵到嶺遂葬焉說者謂侯何昧於自全也夫勇略震主者身危功蓋天下者不賞時乎時乎不再來蒯徹不曾爲侯計乎而乃終爲兒女子所詐也雖然高之忌侯侯所知也侯之死亦侯所甘也當高帝奪印符遊雲夢雖屬中材亦知帝心之叵測使侯從此仗兵威取大寶易易耳况三分天下也而乃曰漢王遇我甚厚不忍鄉利而背義甚矣侯之宅心直與日月爭光矣蓋高帝設壇具禮拜大將繼又操印使王齊侯之視高已謂得一知己可以不恨且即使漢薄待侯而侯始事之終背之千載下又當以侯爲何如人哉此侯所不屑也舍人之告不無詐僞呂后給侯入朝侯竟恬不爲疑殆所謂以身許國者與觀侯臨危有言曰悔不用蒯通之計非果悔也特自明其不反耳知斯意也庶可謁淮陰之墓



上元令房公碑記

邑令白夏穎川  
衛人

嗚呼此上元令房公平泉之墓也公之沒余既誌而藏之幽室矣茲其兄平山公復請余再爲之表樹諸隧道以垂不朽按狀公諱韞玉字以輝別號平泉系出唐房公元齡之裔惟靈石一派繁而且著故公世爲本縣文殊里人自高祖以來居邑北索洲鎮曾祖子鑑祖守旺父登皆淳誠質樸雅重鄉評父以公貴贈新城尹母趙氏亦以公貴贈孺人公兄弟兩人長即教授君韞金公其弟也公生有異質岐嶷穎敏督學曹公奇之補弟子員上等即蜚聲鬻校蔚有文名嘉靖丙午以春秋舉山西鄉試十名主司仍錄其文以爲後學程式尋父母相繼遘疾公憂懼不安湯藥親嘗後進每顛天願以身代居喪哀毀踰禮諸凡可自盡者無所不用其誠教授君時尙需次於庠公友愛篤至事必咨議後行而財無間於爾

我鄉人咸服其孝友丙辰春就選天曹授保定新城知縣捐俸修學士子傾心咸戴革奸察隱銓曹策其最將爲內召新城權貴有忌之者乃量轉應天上元知縣上元京邑政務叢委受制諸司其事勢又有難於新城者公力任其艱益堅初志甫抵任奏革民間與光祿寺柴夫等弊七十二事歲省民財以萬計視新城一無少變民益德之爲建生祠於聚寶門外復勒去思碑并誌其利民之績薦剡中有謂其去思之詠隆於新城循良之績著於赤縣者蓋紀實也在新城保薦五獎勵二十有六在上元保薦七獎勵二十有三兩地俱著有令名計年資聞望應被殊擢乃權要宿憾未釋再爲飛語中傷之遂以壬戌入覲落職士論不平公曰升沉顯晦命也即日西歸所得俸資徧周族戚之貧乏者時教授君亦致政林下公日與之訓子課農怡情山水非公事不入城市鄉里有忿

爭者相爲解紛不使成訟其居鄉可法又如此公操行純潔材能卓犖考其政惟與民慈惠用法平恕捍災禦侮無負百里生民之寄而百姓仰德戴仁勒珉圖像若公者誠當與愛甘棠淚峴山者相爲媲美矣公生於正德癸酉三月初四日卒於萬曆丙子八月二十五日享年六十有四初娶翟氏蚤卒繼郭氏封孺人性天貞烈心地幽閑事舅姑而盡蘋蘩之職相夫子而適顯晦之宜以正德辛巳八月二十八日生因痛公之沒哀毀不食甫及一載遂繼公而逝享年五十有七公有子六長松縣庠生援例儒官次柏京衛千戶三梧府經歷四檀監生五梓監生六樛縣庠生公之葬以卒之年十一月初八日孺人之葬以卒之次年正月初九日與公合葬焉噫亦榮矣公墓在鎮南祖塋之次乃系之以銘銘曰郁郁房公應運而生綿山孕秀汾水鍾靈奇氣夙成雄才自煥摘采元

黃蜚聲藝苑棘圍較藝筆掃千軍魁名高掇冀北空羣筮仕新城  
釐奸溥利加惠窮簷不畏強禦京邑晉秩益殫厥心安民惟惠綽  
有令聞曰北曰南俱由畿內在在棠蔭人心眷戀循良奏績柄用  
方殷權奸鼓釁萋菲成文解組來歸克遂高蹈表正鄉閭允升於  
道好述作配終始成貞蘭芽桂茁有美其芬訓子成名持家一德  
裕後承前永光世葉方期永壽天胡災之斯文之喪不其在茲猗  
與索洲佳城鬱鬱奎璧之間文光上燭慚予作令乃爲公銘有懷  
山斗不盡之衷

靈石縣里民張獻萬經修橋道記

虞奕綬

爲善急聲名紀善者詳貴顯嗟夫身處卑賤食貧力善不求人知  
而卒莫之知是可悲已非悲爲善者之無名悲夫無名者之無以  
勸善也靈邑之西成里有民曰張獻萬力作勤動以墾石田豐歲

僅自給遇歉輒餒性樸厚見人爲善即慕悅之往往竭已貲以成人美無少吝色亦無少德色然欲市之以名輒固却弗應縣之朝陽門外有南橋依山跨汾西鄉之赴治者必由之橋久而圯以工費繁鉅莫敢首事獻萬見病涉者爲泣下矢竭其手足之瘁以身爲之倡况鄉鄰請於官於是當事者策羣力翕然從之鉅工以成又自周宿村至南橋爲道盤屈學學磽磽巖石錯雜行者股慄足褻獻萬惻然於心毅然於色願以一身當五丁之役然卒歉於貲未及舉事乾隆庚戌年七十八病不起呼其子士選告以未竟之志士選乃刻苦節約閱數年計其貲足供役泣告於父之靈而修治之上下十餘里向之畝隘礧礧如臨於木者今則介然寬平如遊於原也鄉人歸美士選士選驚謝曰吾父素不市德矧予小子其何以堪願隱之以成先志歲壬子余因公過其里聞於鄉之民

而知之不禁慨然曰嗚呼豪強貴胄坐擁厚貲視鄉里疾苦如秦越遺金滿籝而損智益過違悖先德往往然矣所謂貴顯而可紀者非譽即諂觀獻萬父子之所爲不亦皇然赧然沮喪而忸怩也乎昔溫國文正公書劉太周文燦蘇慶文臺亨之所爲曰庶幾使爲善者不以隱微而自懈綬於前賢雖去霄壤而使邑之人皆如張氏之所爲是齊民之義風俗之美而宰斯土者之願也忍聽其隱之而弗彰之也哉故標其事於石而題之曰里民張獻萬經修橋道之碣分卑名微有善則錄教義也不及士選善歸於親教孝也

靈石縣重修南橋碑記

虞奕綬

去靈石治之朝陽門外將五百武舊有南橋橫汾而約其流形家者謂地靈萃秀於此理固有之而君子重人事則實以便民也邑

境羣山紛雜治之西南逼臨汾水其外村落周布距治遠者往往數十百里赴治者車不能轍馬不可埒越重山陟阻道負載徒步蟻緣而上偃僂而下以涉於汾橋久而廢爰揭且厲每夏秋之間時雨暴至則奔流汹怒足戰神眩淫雨連日則注波巨浸望洋色阻亦閱冬春陰崖寒水澈脛慄股堅冰常凝踵趾莫措夫以汾右各村之民由數十百里鳥道而至至則病涉如是則有皇然懼慘然悲廢然阻耳誰與宰斯土者熟視無睹而不蹙然心傷也乎余初之官舉諸廢亟亟於此詢之吏則前令已身捐倡募以貲不給輒中止余急爲分俸刻日論工增石爲堦積木成梁約土屬道不需時而竣厥事非敢苟也非示儉也急民之急不可緩也向之皇然廢然者今而後于于而來咸樂稱便蓋欣然色喜可知也若夫易木而石以垂永久是余有待之志也今予將去此恐橋久仍廢

靈石縣志 卷之十  
故述備向者之不便今之速成冀後之君子時修葺焉且成子有待之志是則斯民之幸亦而地靈之效也與是爲記

靈石縣翠峯山文星閣請立條約記

虞奕綬

疇參三才時惟人哉疇首四民僉曰士哉靈石分野在天占次實沈厥星參厥象武在地則東屏綿西襟汾羣山糾錯絕鮮平壤其土瘠則農不給食矣其俗儉則工不備役矣其用約則商不赴市矣而醇謹樸質秀而能文者士習獨彬彬焉蓋自卜子設教西河肇啟文教今邑之峪口祠春秋尸祝不廢則其遺澤遠也顧邑之諸生有言邑界西衝昔多武事起家占文籍者如晨星然自前令柏鄉路侯於翠峯山建文星閣迨桐城張侯復爲移置方位占度丈尺而後靈應屢昭文運大振士之榮顯甲霍屬焉茲縣治之東有峯巍然有閣傑然即其所也祀在卯戌之月多士四集恐規條



不立日久將替祀典士習所係匪淺請示之約爲圭臬奉又翠峯之麓陶者穴之實洩地脈請捐公貲市其地永禁陶工地之所入以供經費余曰善爰列條約并禁陶者從衆志也抑余更有勉者司中司祿玉衡開陽實掌文運而東南占位爲丙爲巳象主文明是閣也於天地秀靈固不爲無助要以潛修力學砥礪奮興所謂勝之以人而爲四民倡者尤在駿奔者克自樹立以荷陰扶則是閣興固與卜子遺祠東西分峙共維文教於久遠而士氣且蒸蒸日上也諸生唯唯而退因以記之

### 靈石記

邑令 王志瀨 華州人

天下之物凡飛潛動植莫不各有其情願凡物之情有生有滅惟石以無生無滅而情獨永則造物之鍾其靈也不亦宜乎靈石晉縣也考邑乘隋文帝開皇十年開山得石有文在其上曰大道永

吉當時以爲祥瑞遂置縣夫當宋齊梁陳偏安江左數十年中禍亂極矣至隋文帝得國勤於政治使天下復爲一統天之生此石以昭其瑞也固宜然不旋踵而煬帝荒淫盜賊蠶起江都巡幸身殞國亡唐神堯僻在晉陽太宗以天授英資早定大計實由此道西行遂以蕩平宇內克成貞觀盛治然則此石之靈爲隋瑞耶抑預兆有唐之興而早出於隋之世耶夫自古聖神云遙龜圖蹟沓臯夔旣沒至寶無聞後世侈言祥瑞凡草木鹿鳥之奇莫不窮搜遠采獻媚人主以文太平之盛不知伊之佐商不必生於桑也呂之興周不必釣得璜也向使興王崛起不能得賢人而輔之以期股肱良而庶事康則雖蓋南山之石徧體皆又恐不周觸天難云補矣然石之爲祥不可知而其靈則不容泯余爲茲邑令三年矣每至石畔摩挲撫玩不能忘情蓋自有此石以來凡居處於靈

石者幾何人來往於靈石者幾何人而以靈石爲其頭銜者又幾何人世代遷移人亡跡泯獨此石高不滿五尺耳睹之而其色蒼然扣之而其聲鏗然將與霍山恆岳同留終古也昔羊叔子登峴山每嘆由來賢哲登此山者皆湮沒無聞而叔子之名實與峴首同其不朽是知人必大賢始可傳於後世不與凡物同其生滅君子疾沒世而名不稱豈獨古人有此情也哉嘉慶十八年暮春下浣因偕友人再玩此石歸而誌之

再訪古碑記

梁中靖 邑人

由夏門西南行六七里日照碑灘兩碑相照故名山勢峙立汾水中流幽谷深邃袤長四十里其南即陰地關蓋古之雀鼠谷也碑在河北者唐咸通十三年蕭珙通濟橋記記有高壁鎮雁歸亭諸勝書法蒼老距水高數尋在河南者唐大中三年節度使王宰記

自叙其陞遷之故與往來之由楷書遒勁入河深數尺又其上有小碑字剝落不可辨蓋古驛通衢遊人多題詠焉乾隆丁未文與喬君訪於牧豎而碑始顯偕同人往揚之今年秋天日清爽水落沙見同遊者復有訪碑之約於是攜酒肴渡略約由古峪灘循水而南水流石崖下匍伏行數武迺緣石磴而登荒徑逼仄狹不容步危臨絕澗激浪怒號心搖目眩惴惴不敢下視約數里始至則覽雄鎮尋古勝碑猶對峙而寒山寂寞野草蒼茫求所謂高壁鎮雁歸亭者渺然不可得噫大中至今九百六十年矣而碑之顯喬君以前無聞焉豈古人勝跡有所待而後見耶抑碑之顯晦自有時耶丁未至今二十五年矣而古碑殘缺又不如昔則後此者可知也亦安知有好事如吾儕者復從而訪之耶時嘉慶辛未重九同遊者李君輯五張君一山李曉又師趙君德貞諸姪象晉光

斗石工甯森

重修永濟橋碑記

舉人劉 溥

猗氏人

晉之水以百數汾爲大源於靜樂流經大鹵之墟瀾靡夷延率出平壤跨西河而下抵靈邑邑南負景霍崑全晉之吭汾自北來繞縣治盤盪如缺激而西南約十里許有橫嶺曰梁家圪塔圪塔者崑阜也南對絕巘河流委輸山峽間束而爲壘始湍疾回薄不可涉盛夏凍澇巖溜谿瀑交灌互澍撼鷁於噴轟雷弩風混潰沙礫甚驅魄礪如轉磴冒壠沒麓旁斷又牙負鬻馱者至却走不敢汲舸扁經過遇風濤上下如漂鼓糜沸無得泊夫是鄉躡居水湄病涉者不一人何空思鼉梁之駕竟驅石無術耶良以所費不貲是用不潰於成乾隆初時和歲稔村人士念車徒竭來之艱糾合該鄉父老募貲捐建爲石橋七孔以濟行旅辛巳秋暴水夜至撼山

嚙崖湧挾巨槎橫堵橋端天吳一震如巨靈鼉羸石破天驚決裂  
中斷自修橋落成後舟柁久廢邑西南諸鄉赴縣並適東睢者往  
往自崖而返有急則蟻附崗脊迺道數十里外如是者匝年有餘  
而功不克舉雖修葺之願人各有心而總理無人誰與共襄吁哉  
重砌之難如此彼繫空者更何如耶爰有國學博士弟子員燕公  
九臯裴公大勇慨念者久之且思昔人創始之時無一藉手不辭  
勞瘁迄今遺跡尙存不及時督治脫數載後頽遭溢淤益難爲工  
因謀諸比里分糾勸輸共續前猷僉曰可乃始經於廿有八年之  
春越明年頽者豎毀者緝缺者補圮者成又增修兩端磴道左右  
檻柱計其從爲步六十有奇崇如其長三十之三橫可容方軌共  
需縉錢數千有贏自是徒者履道坦坦無揭厲之虞但河心  
多砂粒潦水伏衝善掀欲以礪石營其底爲保固計而二公相繼

物故於是二公之子若弟暨諸同事人續成之凡再閱寒暑而告竣實乾隆四十四年夏五月也適邑茂才謙六何生素善余設帳其鄉暇日招爲濠梁之遊指畫其山原之秀麗里閭之攢聚且曰吾邑控引東西百有餘里汾水貫其中劃而爲二凡居邑右者無慮百數十村塢輻輳往還均於此焉問渡昔橋之成邑侯關中張公錫名永濟但未有記故創始者名湮沒不傳其可稽者則補修以後諸人姓氏失今不志後將何考茲鄉人磨碑以竢轉倚先生一言以紀前躅噫吾老矣雅非題柱客然重其請誼有不容辭者爰掇其顛末勒而存之用永憲於後祀

重修公主聖母廟碑記

進士郭岫述

蓋聞家傳孝道猶得立於義門國乃昌明喜合興於靈廟即此公主廟者元基帝子起自王孫芝蘭住足馨香松竹故然蒼翠昔自

大唐天成二載七月初秋雨露調勻稼穡滋茂當於尖陽山上石洞崖中起黑霧濛濛蝗蟲隊隊莫不家家憂懼戶戶生愁恐見荒年怕逢饑饉遂乃申聞縣宰告白川原少者無懷生之心老者抱離鄉之懇當蒙鷹揚軍主靈石縣官聚集群民虔心祈禱尋曾得應感賴公主之靈神也昨蒙東許村隴西押衙西許村隴西長史俱懷信義能蘊規儀鄉黨傳四教之人川原播五常君子深見堂殿破碎廟宇凋殘不忍見聖跡荒涼嗟嘆靈神寥落遂乃釀酒造飯修書遍出鄉郊共謀建造杪捨資賄選買良材揀命班工克時起立算無三載有似撮成奉羨齊心皆懷勝事今者堂殿已就塑畫將終各抱欣誠酬願畢備其廟也東隅大嶽西枕長川聽澗水之潺潺望嶺雲之綽綽風韻松而簫韶得聽月上山而玉鏡堪觀崖洞幽玄林亭翳鬱雲遊者宜逢仙境看翫者道似天宮景置



如嫫女臺前燁嵐勝巫山廟下岫才非禪象智昧尅舟蒙命備文  
聊伸讚頌

七言四韻詩曰 神祇數內最威靈公主嚴嚴先有名信

敬盡聞霑雨露驕輕多見犯雷霆曾臨無道秦皇滅也助當  
令宋帝興伏願陰司高照鑒好將恩福向鄉情

靈石縣尹解九思 縣丞王蘭 大宋咸平五年 月 日立  
重修公主聖母廟碑記

介休縣主簿兼管勾常平倉事安 英撰

傳曰能禦大災則祀之是先王設爲祭祀之典豈徒然哉使人有  
所報也粵若有 神默肆靈威掃除斯害功猶大焉彼民之受其  
賜者苟非竭誠盡敬之詞致祭曷足以報其萬一哉然則神之有  
功於民者以不廢其祀也靈石之東嶽尖陽山山下有公主聖

母廟其神不知出於何代其廟亦不知幾年於茲矣無書莫得其詳有故石刻當大唐天成間蝗出是山之谷人民憂懼虔禱於神曾不崇朝蝗遂遠遁田穉無害歲則豐矣人民感其德遂新其廟而祭之無何宣和用兵之際祀事不舉祠宇浸壞及撫定以來鄉人收合餘燼營葺故基然數次之工未完藻繪之事猶闕奈人情樂於循常而難於改作故自宣和以迄於今馴至太和戊辰之夏風雨不愆黍禾方茂豈意飛蝗騰自東海遽至隣邦冠蓋相望文檄沓來人民怵慄可勝言卽是時縣僚率父老奉牲牢詣神祠而禱焉居無幾村人赴縣庭曰蝗至縣之東境矣於是介休縣主簿安公詣曲買谷望禱神宇主簿耿公詣尖陽山敬謁祠下驅率丁男將宣厥力尙懼蝗熾人力不支翌日蝗蟲無一至者而尖陽山忽有至焉或由山巔群鳥數萬翔翔來往如垂天之雲搏噬蝗屬

使不能西進日夜梭巡如是作三日方霽蝗遂北飛禾稼無纖毫  
之損秋遂有年斯民無疲乏之苦免饑饉之虞皆神靈之陰臨也  
無幾人民願輸以財一新斯廟不愆於素克成厥功歲時致祭以  
報其厚德焉嗚呼螽蝗無害著於春秋見於史乘不一而足豈人  
力之所能爲也前古有蝗不入於循吏所治之境亦或出於偶然  
曷若靈神默相數百年間前後相庇不受斯害以福斯民其功烈  
豈可量耶信謂能禦大災者也是宜享邦人之祀也咸願立石以  
紀其事僕叨佐縣令聞其實而固異之今承鄉人之所請雖辭不  
能遂爲之記焉

武義將軍行汾州靈石尉兼管勾常平倉事

湛

攀 乃

承事郎行汾州靈石主簿兼管勾常平倉事

潘

一 里

信武將軍行汾州靈石縣令兼管勾常平倉事

蒙

古德 溫

金大安二年二月十五日立

夏門道工代賑碑記

太僕寺正卿梁中靖邑人

汾水自縣治折而西南山嶽嶽沙磧礧礧觸石怒號潰獲彌甚  
過永濟橋西流直下而夏門尤當其衝村人甃石治道以通行旅  
復開渠引水以灌田而水勢洶湧輒被衝潰自乾隆壬午道坍而  
渠遂廢嘉慶辛酉水暴至故道湮沒越六七載村人屢議修砌而  
事莫舉夫渠之廢數十年矣而是鄉躡居水濱爲往來衝途使西  
南諸鄉問渡者臨河而返可慨也乙丑丙寅歲大饑斗米千錢貧  
民食草木以延旦夕命諸父老慮村人之填溝壑也僉議修道代  
賑以濟貧乏於是釀金糴米以日計工按口給米老者少者咸仰  
食無失所計需銀一千五百有奇始於丙寅二月三閱寒暑迄己  
巳五月而功成道之從爲步二百四十有奇橫二仞可容方軌崇

如之復砌石通渠以繼前美亦如道之長夫以數十年廢墜之事  
一旦而舉之豈履道坦坦僅免揭厲之虞哉要使分災救患無流  
離之悲共井同鄉敦友助之誼是則諸父老之志也夫

賑荒碑記

咸豐十一年

王掄元

竊維救災卹隣秦汎舟以輸粟省用務穡魯備旱而勸分吾邑自  
己未歲歉呼庚時聞現年芳春更多菜色非無子遺燃眉者藜腸  
覓肚亦有衣褐觸目者鵠面鳩形待麥秋而尙遠人盡愁眉供菜  
把而亦艱祇堪枵腹嗟嗟雀噪空倉苦飢而方知窮困鮒鳴涸轍  
求活而誰給斗升同邑鄉先生等念其懸磬幾失所而流離用計  
戶鐘思金生於推解稟縣尊 袁以統領不博首倡藉平糴局之  
餘貲更思足用念切濟貧殷勤而參指畫誓輸鼎力慷慨而脫腰  
纏六百貫多多益善錢運蝶飛九十石陳陳相因米堆狼戾令出

而聞施白粲婦子驥奔而來宰均而堪度青陽童叟鼠飲而去  
河潤者肩摩行道而並非求福待井養者踵接為食而更戒嗟來  
第見偃僕提携奮微軀以戴德蒙袂輯履竭殘喘以言恩鶉衣而  
結米粟粒粒皆仁龜手而指積倉層層是義蓋九百堪捐原隣里  
鄉黨之誼而六行所重有睦婣任恤之條吾也棠舍低徊難忘遺  
愛竹林徒倚景仰名賢才非黃絹贊善米而何從字擬赤文摹心  
田以畢寫起窮巷而知艱袁君山之尚在願廣廈以徧覆杜子美  
之猶存懿夫分人以財謂之惠此之謂也令聞廣譽施於身不亦  
宜乎

清咸豐十一年辛酉孟冬月 日立

石櫃村修築石橋碑記

耿步蟾 邑人

越靈石而南新闢之汽路左傍韓侯嶺右沿汾流長驅至霍郡中

有新石橋橫互于東西兩岸者舊石曲渡是也值余村石櫃村  
汾流至此潑洄旋折白湧碧翻村人曩于其渡每屆夏秋架木爲  
橋以利往來焉然秋夏之交大水暴發河流陡漲漂木毀橋之患  
常惕息于過客之耳目民國建設以來諸務維新村人議築石墩  
于下支大木于上爲一勞永逸之計畫爰以卜彩所得並提社倉  
儲金爲收採材料之需村人按地撥工並酌給津貼公推家嚴耀  
彩公提綱挈領督辦全工又舉家堂兄步鰲村人郭長年張思溫  
並社內辦公人等分任監工資助工甫及半而暴雨陡發河流陡  
漲墩毀木壞無異前日村人不以敗其謀而益堅其志乃有築橋  
之議起衆皆曰可家嚴先慨捐錢六百緡繼則朱郁明任捐錢貳  
百緡張思忠捐錢壹百緡又廣捐四方慈善之家肆千餘緡前後  
共費錢一萬二千緡合銀洋陸千元自民國八年三月開工至十

二年五月工竣計橋身之長約半里許闢大小洞七孔長虹在望  
 利涉可占巨浪叠興臨深無懼誠一勞而永逸矣余因之有感焉  
 天下事不難於圖始而難於觀成一簣有虧九仞為虛以斯橋之  
 工事屢興屢仆幾不敢與河伯爭尺寸功而村人持以堅毅之力  
 再仆再興則凡有所為無不有成功之日豈止一橋工已哉余供  
 職并垣迭次回里省親觀此橋規模宏壯堪助形勝于一方不禁  
 為余村人幸而尤佩橋工之擘畫幾經艱辛終資利賴為難能而  
 可貴也是為記 中華民國十二年歲次癸亥秋九月吉日立

剏立石櫃邨耿氏宗祠碑記

耿步蟾 邑人

民國庚午之夏五月蟾以巡視省南農鑛林牧諸實業之便假道  
 還里展禮宗祠適追來孝爰集族中兄弟子姪輩而告之曰吾耿  
 氏由道美鎮遷石櫃邨迄於今十世矣自吾父耀彩公於民國



十年感蘇溪道美兩地均有宗祠而石櫃獨付闕如甚非敬宗聚族之道因商同近族以光輝堂祥瑞堂及蟾家光裕堂三門共有之泰生號市坊一壠改建宗祠鳩工庀材或因其舊而略事增修或謀其新而另規營造計是役共需金三百餘圓吾父以一人擔任之族人僉以爲不可父謂是區區者吾力尙能任且建祠之議發軔於吾而乃鯁鯁焉釀資以蕝事是世俗之爲吾心何安工旣竣正擬迎主入祠而父忽病病且篤彌留之際諄諄囑蟾踵成其志且歎曰昔元許魯齋病革家人祀先嘗謂吾一日未死寧不有事於祖考因起奠獻如儀旣徹而卒今宗祠雖立而木主未安祀事未展吾其有愧於魯齋矣命也夫蟾謹泣識之不敢忘時民國十六年秋九月也明年夏四月安葬先父因合族人恭奉歷代神主入祠是爲石櫃邨耿氏宗祠成立之始並懸前

晉北鎮守使今監察院院長趙公次隴手題續緒有聲匾額於正  
 殿前楹以彰 先父敬宗聚族之摯誼焉溯宗祠舊址地只畝餘  
 原建南樓連門道七間作箕形環抱狀其北及東西三面則均為  
 厦棚 先父以舊址太狹殿基難立爰又新購屋後地基畝許建  
 北正殿三大間以妥神王復擬於兩廡建東序西序各三間以供  
 助祭之所志未竟而歿 蟾 稟承先志堂構之思刻縈寤寐惟因供  
 職并垣除每歲清明歸祭外不克隨時假旋繼續祠事今幸公餘  
 之暇得與吾兄弟子姪輩共晤一堂 蟾 擬補築東西序外再設置  
 屏門一座分為前後三進並蒔花種樹俾資瞻仰暨其佗應行添  
 造者仍由 蟾 獨力出資以釋族中負累而經營一切則賴諸族人  
 共同合作庶 蟾 可告無憾於先人而春露秋霜報本返始吾族人  
 入是祠者愾聞僂見之誠有不油然而興者乎爰鑱諸石以示後

昆 山西省政府委員兼農墾廳廳長 裔孫 步蟾謹撰民國十九年五月勒石

女媧廟銘

隴西郡長寧野人牛木述

大金明昌元年八月十一日

府帖下縣帖內該備奉

符文取會到隨處廟觀委絳州察判藺文林郎會太常寺檢討編類今准本官申依應照到隨處廟觀四百六十餘處令檢討到唐宋今及其余見於傳前代帝王各臣烈士有功勳於國家及澤被生民合在祀典者聚之三十三處於內平陽府汾西縣女媧廟帝王世紀云女媧氏風姓也當大化之初以木德而王象日月江明臨照肇嫁娶以序人倫分定九州變化五物天有缺鍊石以補地有傾斷鰲足以立之宋會要云祠女媧氏於晉州爲此具呈 都

省詳酌去後蒙批呈訖奉 台旨准呈送部除另行外相度須合

行下今仰照會欽依前來近奉 聖旨施行本縣乃委縣尉烏古

論信武并 府委趙城縣丞完顏忠顯前後取勘始末皆因是後

雖以節次奉 符施行誠恐歲久厥事暗然姑叙實因聊書作銘

語 銘曰

古晉義豐 長寧舊址 境接霍山 地臨汾水

女媧廟堂 昔營于此 廊廡年深 雨摧風毀

像貌仍存 民為瞻企 祭祀依期 未嘗少已

今幸遵承 顯然條理 聖跡端開 神威真指

浩浩恢恢 万年作紀

信武將軍行汾西縣尉委取勘官烏古論 棊乃

忠顯校尉趙城縣丞府委取勘官完 顏 宗傑

介子辨

俞汝爲

甚哉晉文之譎也余過綿山訪介子推遺事見山勢迴伏蜿蜒數  
百里若奧若堂若復若波而澗谷中冰雪齒齒入夏不消乃嘆曰  
焚何容易哉非豐茅廣野所可燎之原也非叢林聚薪所可赭之  
山也石澗之參差崖谷之委會有伏而藏矣不然遁而走矣縱不  
愛身以博名高何忍抱其母與之俱燼此非人情不可信而史氏  
書之莫矯其非者得非紀過有田禁火有令且以紀時且以名邑  
遂據而不疑耶夫惟再據者是以爲譎也且推與文周旋患難十  
九年至割股以進豈不深自結納必於隱者窺晉文之素也祿弗  
及可去矣去之不遠入山惟恐不深肯局曲一隅母子相抱以待  
焚耶况晉文之求非本心也無解於懸書思以覆之耳豈不知亡  
者必不返而故急之豈不知茲山不可焚而故令之豈不知推必

不死而故彰大之凡以塗人耳目非為推也當其時卑辭謝過厚  
 祿以招之無弗至者怒而焚益其亡矣為推者如是乎不然山既  
 焚矣禁火何為骨已灰矣封田奚益何不錄推後以介田之入祿  
 之耶何不收母子之燼介田之封封之耶兩者無聞徒虛辭宣令  
 甚哉晉文之譎也或曰山隸靈石有推墓在余望之頽然一邱耳  
 郡志謂推必不能隱即隱矣無不可追辨以為非是然則可焚則  
 可踪踪之不可得焚何容易也

靈石頌

井序

邑令 虞奕綬

金壇人

石何以命縣重縣也靈何以命石重石也以一石係一邑之奠安  
 故命之也康熙朝前令侯公榮圭撰靈石縣志稱隋開皇十年文  
 帝幸太原傍汾河開道獲巨石有文曰大道永吉以為瑞因於其  
 地置縣其注沿革如此而不詳所本夫以石為瑞當以瑞名石何

靈之也今邑之二驛一曰瑞石何係於驛則瑞之而係於縣則靈之也考北史隋志兩京新志諸書若武安之隕石高帝之埋石咸陽之移石於隋事蓋詳而茲石未之聞焉若文字之異則魏青龍中之柳谷口石唐貞觀中之鴻池谷石宋太宗夾江石徽宗時綠石類此者蓋難縷述咸謂符命之應其實皆人爲之即一時惑之以爲瑞豈傳之既久猶尊之以爲靈耶天寶間李應物開砥柱石中得古鐵犁鏵有平陸字因改爲平陸縣亦就物質隱起意爲附會耳矧靈石二字與大道永吉文固無涉耶前志所稱旣不足爲命名據亦未足爲斯縣重也獨其注古蹟則稱或云留此石以鎮城北之水患者而究無專辭余初之官卽而觀之去今永固門外不半里高將及尋周倍之石本入土莫測丈尺其形則河朔之林慮太湖之彈窩也其聲則太末之思溪泗上之靈璧也其文不可

靈石縣志 卷之十一 三十二  
復見審察其實則或闇者如鐵或章者如銅而文且理者猶是石也錯雜融結礪然天成昔程大昌釋禹貢怪石以爲質狀色澤似石非石殆若是乎則曷不怪之而靈之也夫靈神也福也縣治地處窪下汾自北來近收東河之水直注城下西折而南稽之前志諮於父老汾之爲患屢矣茲石屹然當其衝猶砥柱也故城巋然得存今夏六月積霖如注附郭廬舍皆湮沒汹汹者以爲城且不完乃水溢及石輒殺其勢順軌而下如神助然城卒無恙夫乃恍然於金土化制之義以爲有斯石乃有斯城也有斯城乃有斯縣也是其爲台駘所呵護而爲福於茲邑靈之爲靈洵昭昭矣則以靈命石以石命縣也固宜因奠以酒醴而爲之頌曰

嗟嗟斯石

學學其容

得一以寧

地靈是鍾

爲高名臺

爲下名沼

惟茲天涯

民和永召



臨川有廩

饒州有倉

孰若茲石

福我無疆

垣墉仡仡

汾流活活

永奠此邦

不遷不泐

靈石縣禁陶令

虞奕綬

自有熊氏命寧封爲陶正民利其用後世因之蓋如布帛菽粟之不能相離矣顧螭牛之後陶河之濱未聞與成邑成都者近爭地利也靈邑三里之城西南北皆瀕汾惟東壁近負山麓自翠峯山至龍旺頭爲城之屏衛地脈實由之以興麗斯土者咸視此爲安危矣歲庚戌民有利重貲者棄其地於陶人阜者穴隆者日窪居民慮亡其唇寒其齒也且城居素無火驚不習撲救自陶工旣興夜火如燭數月之內聞譁譁而駭出出者告災之屢譁然不寧僉以咎陶余旣命爲防禳之謀備其撲滅之具且爲之令永禁陶工曰凡有附郭之民委地於陶及陶人不請於官擅興工作者聽民

告而治之於是民情帖然聞禁以來無復祝融之警已數年於此矣夫古者復穴之制亦屬之陶而欲利民用必先定民居余恐久而相忘禁仍弛也故書於石

重修惠濟寺碑文

進士趙子璨 邑人

靈石山川之勝甲諸郡邑尖陽奇秀騰驤磊落自東南來岡益紆峯益聳柳子厚遊記謂奧如曠如者所在皆是其中宮觀祠廟招提蘭若精藍法宇之屬不可勝數蓋縣古刹廿餘而

惠濟寺爲稱首寺在城北街西北距綿水數十武綿水自介山直抵瑞石汾流由北至受之綿汾交匯之區誠晉南靈氣所鬱蟠而寺據全勝焉始遠不溯明清增建稍有碑石近復荒廢光緒丁酉邑紳疏募興復土木旣畢雖朽者易傾者正而丹漆未備黝然無章 三大士及 地藏金色掩抑不明旁列 諸神幾毀敝無存

觀者憫焉大檀越董君翰臣儒林謂先王母爲曾祖姑至戚也慷慨重義篤行好善其生平濟急扶危果於任事救人之難能爲人所不爲全益甚多昭然在耳目閒觀此寺功廢於半途惜同棄井思深覆簣引爲己責甲寅仲冬獨力募捐不數月而貲已具粵以乙卯午月經始其事中安  眸容如瞻滿月交延綺窗阿閣重階妃黃儷白引丹刻翠眩轉熒煌照耀天地鐫粉壁以墨華飾雕拱以金屑燁雲起滅濠采高翔東有變相善現或獅馴象臥或龍降虎伏勃如戰色靄乎其儀窮形盡態惟妙惟肖西則檜栢森羅物象猙獰凡可以驚心動魄資勸懲怵愚頑者赫然悉備至壯繆英姿冕旒秀發  社公眸蟹貓迎虎祭  天祇儼雅環聽列侍  金剛猛烈努目翊戶皆補苴罅裂飾以青紫其繪事也靈均呵壁而向天博望乘槎而尋源玄奘巡歷道邦武穆精忠涅字莫不搜奇

搢異精研奧秘可謂畫手看前輩擅場裝演畢天下能事矣董君復以珠簾繡柱迥絕塵囂而庭陰花甌苔侵蘚蝕非所以昭祇敬示嚴恪也於是水平懸直連巖萬計弓中唐以引路承檐溜以涎渠旁及軒名聞籟室號餐霞意蕊潛舒心香妙撲簪之班荆蔭松洋洋聞齋魚粥鼓聲而寺功於焉落成蠲吉時練芳辰戒賓鴻速嘉客冠蓋相望接踵道左其以孟秋之月廿七庚子禮 神已詹是日也玉宇澄清三光色潤五鼓既作畢星正中董君與百執事之人潔齋戾止足容重手容恭垂紳正衣肅慎將事壇煙繚繞撞鐘鳴角簫管繼作四土競氣道官法曲飄逸清幽蘇門鸞鳳之嘯魚山梵唄之音不是過也精誠既至感格人天則見祥風披拂慶雲縹緲上 神下祇恍惚畢現來享禋祀况復錢施山積幣聚成堆竹林之高賢並至鹿苑之緇衲偕來次日於西門大振勝旛建

水陸道場蓋觀者如堵墻夾道之人相與駢肩紫跡歡呼讚賞以  
董君明允篤誠功德在人其素所樹立也而茲寺之金碧相輝煥  
然一新尤其犖犖大者不可以弗誌語本寺禪師勒諸貞珉以垂  
不朽董君謙不自承以諸公施助之力囑璨記之抑璨更有進焉  
者夫天下祀神多矣祠宇亦甚衆矣惟佛力所及自通都大邑  
以至山陬海澨窮鄉僻壤其崇奉之隆無不竭一方之力造作宮  
闕戴黃屋設丹墀服尙杏色煌煌乎創制自顯庸帝者之上儀漢  
唐以來貴爲天子亦且稽首膜拜其故可深思也按史記匈奴傳  
漢使驃騎將軍霍去病將萬騎出隴西過焉支山千餘里擊匈奴  
破得休屠所祭金人爲其祖無疑而五帝紀帝嚳高辛氏金天氏  
之孫亦氏金天意卽世所奉佛也後漢書楚王英傳注佛者  
漢言覺也將以覺悟羣生也帝嚳之嚳文從覺省聲亦訓覺是

佛即嚳音之轉也廣雅疏證引馬融廣成頌散毛族栝羽羣栝與嚳其義同緇衣有栝德行毛詩作有覺德行覺栝嚳通爲一字佛之字梵語 佛華言覺覺即嚳之別字故 佛本帝嚳系出金天其像金身其位西方禮祭法帝嚳能序星辰以著衆與相傳 佛之神通玄化正合其姜嫄簡狄慶都諸妃靈異疊著載在墳典左氏春秋傳少昊氏有四叔曰重曰該曰修曰熙實能金木及水是謂五官祀爲貴神高辛氏有二子伯曰闕伯季曰實沈闕伯遷商邱主辰實沈遷大夏主參亦俱爲神明則今之四天王當即重該修熙而闕伯實沈即山門 二神也由是以推益足徵 佛爲帝嚳之非謬代遠年湮書缺有閒中外言語不通展轉相訛誤謂帝嚳爲佛耳嚳生爲明帝歿爲明神故普天率土祀典相沿而用帝制內典 佛蹟約魏晉人清談附會不然豈其肇自西域遂能薄

海古今如是之尊崇也哉因惠濟寺之役附其義於此董君之作而新之所以崇德報功與邑媯皇柏皇等祠同千古其聲施奕禩澤流後昆不亦宜乎而樂輸與董事姓字并刻焉以傳異日博雅名流煙霞俊侶倘能杖策來遊流連勝境登高邱而望遠發思古之幽情願爲同調賡之敢集葩經而爲斯頌其詞曰

厥初生民不識不知受命旣固氓之蚩蚩有覺德行佛時仔肩匪直也人胡然而天明明天子是生后稷實維我儀莫匪爾極萬邦爲憲四國順之凡今之人蓋亦勿思昏楛靡共克禋克祀無易由言實虹小子乃眷西顧彼汾一曲濯濯厥靈漸漸之石此維與宅祀事孔明闕宮有恤有紀有堂如彼泉流無淪胥以亡允矣君子載錫之光是斷是度寢成孔安新廟奕奕松柏丸丸有覺其盈載玄載黃終朝采綠我朱孔揚卉木萋止白華菅兮卜云其吉爰契

我龜靴磬祝圉鼓鐘鏘鏘樂既入奏我將我享小大稽首降福無疆有椒其馨有飴其香於萬斯年德音不忘

蓋聞善作者不必善成善始者不必善終况佛道崇虛清淨無爲不計廢興豈有增飾外觀化朽壤爲臺榭易草萊爲階除耗銷物力以營土木者然妙化所敷無往不應眞精所萃有感斯通其不疾而速不行而至巍然輪奐成之刻日者於 惠濟寺一役見之矣創自何代殘碑湮沒難資考核相傳翠峯山麓有上寺此其下寺也案縣舊城基在今北街石坡則昔時兩寺均附郭外如香山詩上界鐘聲下界聞是鐘鏜存者泐明弘治其他石風消雨磨半不可識皆隆慶萬歷時樹清之有天下乾嘉中一再增修而已寺故與敝居比鄰少歲每候屆請和商賈雲集假作市場人物繁湊囂喧之聲達於戶內又爲宣詔讀法雩水旱之所老樹參天翠柏



棲雲亦不時嬉遊其際後讀書清涼寺見明進士裴繼芳留碣有  
田歸後藉 惠濟寺習靜之語則爲今古名勝地可知也乃十餘  
載而潦涇塵封頽垣敗瓦無復梳理兩廊像設旣經剝落而山門  
尤圯甚擔夫牧豎踰牆爲捷徑齋溜之所經行之室幾成平土關  
之闕其無人饑饉鬪蛇紛然雜出其間迨光緒丁丑大禋而古木  
數株亦刊伐爲饗殮之謀蓋於是荒廢益甚矣家仲玉兄子瑗元  
旦展謁仰觀正座如放光明潛心默禱若得興修當効微力俄禪  
師性成明福遂邀士紳議欲興復力不從志趙君錦章煥春率先  
倡捐衆紳踴躍從事城廂已四百餘貫其後遠近緣募克集鉅欸  
度材庀徒僉以艱鉅難勝莫肯應者適孟縣匠氏李自抱腹巖來  
偶憩寺中願得千緡任茲重役登登憑憑百堵皆作寂無人聲殿  
壁之堅椽瓦之整築石鑿池以疏積水繚之周垣無不精固爰有

拜亭楹柱傾斜特甚上重數百鈞李及其子引以一繩俄頃建立  
蓋有佛力焉未幾而瓦礫之場宮觀特起視舊制之營以土磚  
者殆又過之金元好問記有之富者以貲工者以巧壯者以力真  
莫之爲而爲莫之致而致歟庚子五月京師義和拳起檀施少減  
是歲秋穀不登邦人士以年凶殺禮故雖規模大備而暨茨丹牖  
與夫法相莊嚴黃金布地尙卹乎未遑是役也經始於疆圉作噩  
之歲而駐工於景廟二十六載用泉布一百七十萬有奇倘所謂  
莫爲之前雖美弗彰莫爲之後雖盛弗傳者非邪至助施鼓舞重  
督勤劬例在言時稱伐銘功之列後有君子其亦知所觀感也夫

重修靈石縣瑞雲觀碑文

進士趙子璨 邑人

原夫鴻濛未啓一元之默運有常混沌初分二氣之相摩靡盡生  
人之始象帝之先炭構陰陽鑪然天地懸則爲日星之著融而爲

河岳之形神行於無聲而發於有聲道藏於無氣而顯於有氣端倪呈露衆類繁滋人爲萬物之靈性原可貴君乃羣龍之長首出咸瞻遐哉復乎非得一以清得一以寧得一以爲天下正其孰能與於此乎洪維

三皇撫期命世膺籙受圖紹盤古之軌蹤歷九頭之時代丕變乎穴居鮮食聲重燧巢潛移乎獠俗革衣風高懷葛史記索隱之補僅傳蜚佻號名通鑑外紀之編半屬洪荒事蹟斯固路史竹書之所不備鄭僑邾子之所未詳鳥火昂虛二十有八星虞書之歲差莫測元會運世一萬八百載皇極之巧曆難推蓋天開於子地闢於丑人生於寅至人無名大聖不作明德遠矣神功昭然靈石舊號竹林即穆天子傳所云玄池廣樂乃樹之竹是曰竹林者也又霍侯舊國不遠是謂重陰天子作詩有曰我徂黃竹云云疑重陰

即隋唐之陰地關而黃竹即竹林也又盛姬衣冠之藏在樂池南而云天子北升於大北之隘郭璞注疑此太行山也天子南登於薄山竇軫之隘郭注竇軫在河東大陽縣則立池竹林爲今靈石竹林無疑故古蹟甚多神祠尤衆女媧廟貌震位攸崇柏皇明禋良峰高峙而竹林古治東瑞雲觀獨祀

三皇爾其地據平衍宅惟爽塏東則翠岫之所屏環西則汾流之所湍激北枕綿水宮近無夷南臨石桐岩穿千佛泰岱朝雨接龍柱於碧霞清涼晚煙聞魚山於夕梵篝燈嚴而夜照明駝與征鐸齊喧旭日耀而晨鮮紫莧共青葱並茂有鳶影魚影映酸棗於午潭有鈴聲鐘聲表文峰於丹閣其日暮之景也若乃農壇祈穀春鳩載鳴女堞垂楊秋鷹厲翮沒車冬嶺之雪落葉夏槐之陰岸桃灼而隴麥香園蝶黃而城鴉縮斯又時物變態千形萬狀不可殫

論者也其宮觀之立也式侔仙造聿奠神居三元血食於前楹列  
聖睟容於闕寢月臺四闕制擬明堂香閣重檐規摹瑣閣左以仙  
眞之縹緲右以地府之森嚴並長廡周廻宏模特起松棟素延於  
三殿藻栱深度於五筵嗟大木兮難求實公輸之巧製創建乎累  
代增修於有明初崇飾於中宗之朝七世伯祖諱時治與其列焉  
繼募貲於神宗之際八世伯祖諱應選爲有勤焉然而澤五世而  
莫延法百年而終蔽荒苔易挖不朽難謀嘉道補苴無關修廢咸  
同未造未暇復興古樹巢於鸛鷓頽垣竄於鼯鼠皇華驛使撫喬  
木而傷心藉草長年過故宮而動色玉衣自舉恍借況於征塵鍊  
馬常驅疑止濘於小駟法曲飄零而無問道侶闕寂其無人斯亦  
可爲長太息矣煥春趙君字錦章幼懷精敏夙尙希夷皓月盟心  
清泉矢志繼仲連之高躅利俗釋紛學展獲之和風寬鄙敦薄積

行積仁而無怨立功立德而何慚以建築爲可傳以修禳爲已任披荆斬棘天竺則珠璧交輝理穢鋤荒惠濟則金銀布地葺蘭篔於聖母玉樹蒙床翦茅茨於土功嘉禾獲祉慈善之衷旣著天人之感彌通智仞所游勝緣便結以

三皇聖功綿遠瑞雲法宇久傾棟折榱崩子產懼其將壓酒酸性瘠昌黎譏其不虔於是矢念興修銳圖規復詢謀庶士爰及搢紳工以遠來材因地取長繩拽而丁丁伐木百堵興而仡仡崇墉碧瓦參差切飛夢於蜿漢綠窗窈窕連鎖院於龍宮御座引瞻則旒垂十二紫微北向則位協九重莫不圭首終葵袞浮采藻復三元之舊宇通八蜡於五方廊四起以楹閑階三重而納陛層軒廣廈經堂齋室施亞黝而勤丹牖美輪奐而壯鳥翬璇題高聳仰觀則照灼朱霞洞戶深嚴廻薄則靄餘白日昔之存畫梁於魯殿者今

則易平楚爲仙閭矣粵以庚戌之年建戌之月節近重陽場開九  
市乃招鈞奏以答 神庥梨園空冀北之羣菊部盡晉南之選清  
音泫唱聽絳樹之雙聲舞袖弓腰揄綠珠之長袂况乎火明百雉  
彩耀五衢燈影隨月影交輝鳳輦雲中之景衣光偕日光相映蛾  
眉竿上之裝獸炭焚龍延蕤蕙石則洪鐘迭奏三牲則同凡錯陳  
垂帶正紳青衿之衣冠甚楚遺簪墜珥立妻之髮鑑如雲車聲動  
而雷殷驢背騎而風詠金錢山積幣帛露屯羅長筵設廣宴肴由  
盤進麟脯八厨酒以壘行龍文百榼馬畜彌山牲牢蔽野誰非檀  
越之施揮汗爲雨連袂成帷悉屬瓣香之侶自時厥後以迄於今  
神悅民憇歲豐穀熟畝穫一石麥秀兩歧蓋十日而報功誠百  
年所僅見者也璨蘭臺修帙杏苑探芳丹陛陳辭承恩光於慈聖  
黃堂歷仕訪神邸於宋朝序屬杪秋賦雁歸於鄂渚躬逢盛會助

馬當於洪都相官梁帝之碑每懷鏤刻頭陀簡棲之筆夙慕文辭  
夢得立都詠栽桃於去後裕之天慶擬招鶴於遺編操清徵之音  
作瑞雲之引以當送迎神曲其詞云雲之英兮霧煙霏輪囷紛郁  
八表垂爛縵縵慶光輝帝世賡歌勅時幾白雲在天王母祠起封  
中兮憶雄姿穆滿漢徹餘芳規千載悠悠繫人思矧維

三皇德無儷山陬報祠禮則宜瑞石之旁有遺祠地勢逶迤平不  
陂松棟雲牖靈光巋傳聞鬼工煩般僦日消月鑠風雨欺年深豈  
免折楠榱權枿灌木吟梟鷓莓苔砌落生荆葵彼都君子如璋圭  
粟帛堆阜銀山施登馮馮兮斧以斯坐見朽腐爲神奇棟宇糾葛  
臺參差晨霞夕照俱蔽虧剝豕燠雞侑觸卮祥光滿室雲烟飛笙  
歌鏡吹間竹絲神壇饗鼓十日齊驩乎拍手士女嬉萬樹銀花相  
攀追神之歆兮降福釐歲無苦厄妖厲驅媧皇擊磬柏皇趨述職



河宗舞馮夷天馬翔兮寶瑟携紫扉飄飄拂靈旗我來正逢菊花  
時再拜馨香薦丹墀霓旌風憶電轂馳雲之車兮翩然來三皇不  
作誰與歸安得至治如黃虞

重修靈石縣 文廟碑文

進士趙子琛 邑人

清歷九世地大物博聲教四訖舟車所萃言厯譎雜漸與孔殊孝  
欽閱之乃詔廷臣議尊 孔禮秩宗率職升

孔子爲大祀儀與太廟等丁未奏可制定禮器一鉶二簋簋四籩  
豆十二牲牢遞加樂舞數亦如之旌十有二節 神位金面漆書  
上親臨幸不履中門百官由右入闔左扉以避至尊煌煌乎盛典  
也命下日薄海行省莫不景服一時焜耀頌聲同作而靈石 廟  
學亦在其中竊維孔子之道躬行實踐平易近人由灑掃應對至  
精義入神由慎獨謹幾至中和位育其教易明其事易行以修己

治人爲要以繼往開來爲任近之日用倫常遠之天地民物上而  
虞夏商周下而漢唐宋明莫不至善能止心法相傳朗乎日月之  
行淵乎河海之滙斯誠統寰區亘終古立人道之極者也若乃述  
古信好綜括六藝尤可言焉易三百八十四爻書五十八篇詩三  
百十一篇周官三百六十儀禮禮記出漢儒編輯春秋本魯史舊  
文大抵辭有所指義取各當惟論語四百八十二章視他經爲多  
且包孕宏富一章兼數意一語涵萬有比比皆是又十翼之贊又  
成數萬獲麟一經筆削具存自來著作之林罕有其匹况復崇正  
黜邪怪神不語據德依仁雅言爲教渾渾焉浩浩焉子輿比之江  
漢秋陽有若贊爲鳳凰麒麟宰予有賢於之稱端木輿未有之歎  
所謂天不變道亦不變一言而爲天下法匹夫而爲萬世師修之  
吉而悖之凶由則治而否則亂者此也 廟舊在縣治西五十年

前 先君子通奉大夫久菴公與廣文吳命三錫疇白庚西星煒  
倡議復興宏規崇飾俯仰之間已爲陳迹民國著雍敦牂之歲邑  
紳家兄分發任用縣知事趙子瑗分發任用縣知事李翊宸警察  
廳衛生科警正王承基簡任職任用實業廳科長耿步蟾督軍府  
編輯處編輯員李書田前署平定縣警務長段紹曾山西圖書館  
文牘員何厚香山西行政研究所畢業宣講員毛纘緒山西第一  
師範學校教員耿步瑞山西財政廳總務科科員張士僑山西財  
政廳制用科科員陳楷山西省立第一師範學校教員王俊又集  
議會垣合辭請 邑宰駱侯撥款興修 省令許可委前藍翎同  
知銜候補府經歷董儒林前丁酉科拔貢直隸州州判署滎河縣  
知事張鸞詔前孝廉方正直隸補用州判增貢生張樹鼎前藍翎  
五品銜張福庚爲經理前五品封典按經歷銜江蘇儘先補用府

經歷附貢生吳濟忠前附貢生張映南優廩生張崇烈前優廩生楊元昌爲督工於是經之營之不日則月魏闕雲齊軒廡霞灼闕宮有恤傑閣流丹金碧相映藻采高翔其鳩工度材庀徒程日吳紳濟忠專其責祭器有式佾舞有列爲之繫圖說詳步武以瞻其修明齋邀有所庋藏有廚爲之嚴定章禁寓人以重其祀典家兄子瑗任其事而旌旄九節則子璨據會典以增爲十二焉 廟工經始於己未二月落成於九月用錢二百五十萬有奇 崇聖殿起辛酉年八月是歲九月告竣用錢十九萬旣蒞事邦人士謂麗牲之石宜有文紀以命於璨璨以方今異說爭鳴獨能修宮作泮是務則楊墨熄而孔道著經正民興在此役也且以見聖道爲萬物宗仰後世殊方外域曰爲奇技異能者胥受其範圍其曰衆星拱辰渾圓之說也居夷乘桴海舶之謂也舉一反三弧角之法也

遠近高卑測量之術也同聲相應同氣相求聲學化學也不疾而速不行而至電學光學也頤中有物曰噬嗑雷電合而章則火器備矣夫其至誠如神後世之事燭照數計如天之覆容光必察若川之流無微不至可謂至聖也已至聞災斷爲桓僖刪書終於秦誓來者可知語近於讖蓋無取焉人負陰抱陽受中以生聖人建中立極陰陽合德凡有血氣莫不尊親冠帶之倫孰能自外生成而不思推崇也哉璨旣嘉邦之人士於是能昌明聖教也而邑侯贊成之功諸紳疏募之力並在言時稱伐之列乃爲之歌魏俾作奚頌其辭曰彼汾一曲新廟奕奕展也大成莫匪爾極彼汾沮洳潛有多魚籩豆有且言觀其旂彼汾一方鼓鐘將將君子至止萬舞洋洋濯濯厥靈漸漸之石丞我髦士時萬時億

民國八年九月

宋贈尙書祠部員外郎文府君墓誌銘

文彥博

夫水之有原原出之深者其流長人之本祖祖德之厚者其嗣昌  
噫原深德厚者見之吾祖祠部府君矣君諱鏡字挺之本姓敬當  
晉室以犯高祖御名改賜今姓取文象也至聖朝以避翼祖廟諱  
遂不復舊有媯裔遷於齊子完之孫以謚爲姓自時厥後胄緒益  
蕃或占籍於平陽或流居於蒲坂八代祖太尉平陽王有大勳力  
於中宗載于國書可攷太祖晤太和中由鴻臚丞辟北都畱守判  
官曾王父繼時以明經中第守汾州叅軍未幾畱判歸老於西河  
叅軍榮侍於膝下且又嘉是山水樂其風土乃自河東縣之同果  
里徙居於是故府君今爲西河介休人也王父沼澤州錄事叅軍  
烈考崇遠長興中守遼州平城簿與晉高祖有豐沛之舊天福初  
龍興大夏鳳起晉陽遂以協贊之功亟昇出宰之任授代州崞縣  
令稍遷并州太谷令帷幄之助居多而綿上之封蓋薄方將偕隱

以保天和屬劉氏偏羈於太原選用俊賢縻以要職而又兩宰劇縣載更都轄而考終於家有子二人其長蚤亡府君即其次也始以蔭補郊社署丞尋辟石州軍事推官太平興國中武車載駕王師有征後主率并民因壘太宗皇帝需陽春之澤封歸命之侯凡劉氏之舊臣率度材而被用時府君方以府退便於家居且以頤養爲懷無復出處之意雖詔書搜訪州司敦遣竟以疾辭不克上道常以杖履浮沉於鄉里頗用文酒燕樂於朋友故與進士溫夢說詩舊崇果詔休輩有世外莫逆之契藥餌弗驗壞梁斯及以至道二年九月三日起手足於晉陵里之第享年五十有三府君始娶王氏故戶部郎中丕之女也生慶善之門稟柔懿之德天奪其算先府君而亡有子三人長曰泊今爲司訓員外郎荆湖南路轉運使次曰淳郊社齋郎次曰淵未仕而亡有女一人適史氏再娶

郭氏有子一人曰涓府君以長子登朝遘慶凡四追命爲尙書祠  
曹員外郎夫人追封臨沂縣太君娶耿氏有子一人曰彥博即府  
君嫡孫天聖五年春進士甲科今爲殿中丞知并州榆次縣權倖  
西河郡事而耿氏早亡亦以彥博預殿閣之引籍遘農壇之展禮  
得援恩例追封扶風縣君再娶王氏封永樂縣君有子一人曰彥  
若應進士舉有女二人長適將作監主簿鞠齊鄉故天章閣待制  
咏之子也次適進士成偉殿中丞元吉之子府君之次男淳始娶  
郭氏冀氏皆蚤亡今娶武氏有子四人長曰彥先次曰彥國其次  
幼涓娶王氏斯皆府君貽謀積德之至厚故子孫錫美流光之寢  
昌也彥博之生也後不逮事捧遺硯以出涕瞻畫像而下榻嘗立  
侍於父叔因習聞於話言曰惟府君局量宏深性資端厚德行著  
於鄉黨仁愛洽於族姻希蜀嚴之沉溟達義易之素履善教諸子



俾紹家聲惟以清白傳家不以產業爲事識者以府君爲林宗干  
木西河之後出也所不至者壽耳府君棄代之年權窆於里第之  
西原今即眞宅以明道二年十月十七日己酉得吉卜於靈石縣  
之孝義原祖母臨沂太君先葬於介休之西原陪祖之舊封松檟  
美茂不復遷祔從古禮也禮曰銘者稱先祖之美表孝孫之心也  
庸刻沈礎以識佳城銘曰

王父之德柔嘉維則行有枝葉信著金石州黨肯化宗姻是式跌  
巖文石涵泳興籍美璞中存含英內蘊道屈當世慶流後昆祠曹  
追命密印推恩綿山南峙汾水東瀾吁嗟佳城茲焉寧止爰石勒  
銘徽音無已

夏門村太僕寺卿與亭梁公墓誌銘

兵部侍郎翰林院檢討韓克均

汾陽人

公姓梁氏諱中靖字與亭號秋園世居晉之靈石縣夏門村曾祖諱謙祖諱宏魏父諱繪星三世習儒業不求仕進以公貴皆贈如其官曾祖妣房氏祖妣牛氏荀氏閻氏劉氏妣王氏王氏張氏王氏皆贈太恭人晉贈太淑人贈公生子四公居三天性穎異尤敦孝友年未及冠相繼失怙恃或有以輟學勸者公奮然曰不讀書何以繼先志乃益篤於學初應童試補博學弟子員旋食餼嘉慶戊午以貢生舉順天鄉試辛酉成進士改庶吉士散館以知縣候選家居近八年訓課子弟周卹鄉閭續先人未竟之緒費不惜勞亦不惜也汾河水勢湍急靈邑夏門村當其衝營石以導其勢開渠以暢其流畝畝資灌溉之利歲久湮塞河流壅衍值大禘斗米易千錢公倣范文正公以工代賑之法釀金糴粟計工授食民之無業者賴以存活粟盡而工竣是歲也災不爲害公之力居多焉

夏門村歲徵官芻數千觔里氓咸以爲苦先是贈公欲每歲以數十金代償之而未果公曰此吾父未酬之志也爰解囊出金數百付里長歲以其息應役窮黎永利賴之公之嘉惠里黨類如此嘉慶十六年選授廣西平樂縣知縣未抵任納貲爲員外郎十九年授吏部驗封司員外兼考功司事凡六年擢浙江道監察御史以錢法日敝奏請嚴申例禁得旨褒嘉下部議行皇上龍飛元年劾奏知縣匿喪者一勒索者一皆禡革回子伯克年班入京道經晉省需索驛站奏請嚴禁江西州縣虧缺雜稅奏請清查上悉可之二年六月督理五城街道京察一等旋掌京畿道監察御史晉檢次縣有惡棍閻思虎者橫行鄉曲鄰女趙年十三虎窺其父母出突強淫之訴於官以和姦逼供不服則鞭杖交下女忿自戕於公堂值大暑暴屍數日膚色如生其家人走京師具控上命大吏覆

讞仍以和姦斷沉寃慘毒無不切齒公具疏駁詰至千餘言得旨  
交部訊案至京一鞠而成信讞上溫旨褒獎加四品秩不踰月擢  
太僕寺少卿十年轉大理寺少卿稽查左翼宗學十一年遷太僕  
寺卿署光祿寺卿十二年冬染寒疾醫久不痊次年春乞假開缺  
奉回籍調理之命未就道以疾卒當易箐時沐浴正衣冠訓諸子  
以修身力學之道並惓惓以君恩未報爲念語不及私嗚呼如公  
者誠不愧古君子矣公自居言路歷卿曹慷慨激昂以身許國凡  
事之有裨於政治有利於民生者無不言先是畿輔莠民傳習邪  
教黨與甚多緝捕四出株連者或不免公於十二年春具疏請寬  
刑獄反復於天人相應洪範五行之徵得旨駁斥有讀書不明理  
之諭嗚呼讀書之名豈易得哉公其可以不朽矣公生於乾隆三  
十年乙酉五月二十四日戌時卒於道光十三年四月初一日申

時享年六十有九元配王氏贈淑人以嘉慶九年二月初一日卒  
繼配燕氏贈淑人以二年七月初二日卒再繼配燕氏以十年四  
月十六日卒子長象垣太學生次象祖太學生出嗣公弟虛舟次  
象融女二長適同邑陳枚豫雲南安豐井鹽大使次適介邑宋紹  
祁太學生孫一今以道光十三年十一月初二日葬公於北莊原  
祖塋之次其孤以墓道之石請銘於余余之與公生同鄉先後同  
館同御史臺知公甚悉未敢以固陋辭因爲之銘曰

靈石之秀篤生斯人孝於爲子忠於爲臣其言諤諤其容恂恂十  
年臺諫爲國爲民忽駟箕而長往殆無昧乎前因草芊繇兮未翁  
翳永安千禩兮永貞斯珉

清授文林郎附貢生耀彩耿公墓誌銘

介休縣知事王承基

邑人

公諱爭光字耀彩祖居靈石東鄉其村曰蘇溪清季有故廣文諱  
文光孝廉者邑中稱斗垣先生薊北王公梅岑視學山右以藏書  
宏富著述等身褒獎之刻有讀書記書目答問行世即 公族也  
公之先當元明交分居南鄉道美鎮前清初年由道美復分居  
石櫃村今垂十世矣耕讀承家奕世弗替 公考諱學孟字希賢  
生丈夫子三 公其季也幼慧爲考鍾愛稍長就外傳年十八而  
孤太夫人任督責益厲乃命負笈從霍郡任君學而令公諸兄賈  
光緒辛巳以前茅成秀才學使王可莊殿撰許爲大器 公爲學  
務實踐自爲諸生居恆慮食指繁不忍自逸勞諸兄遂棄舉業董  
家政力田課姪每謂苟俯仰有資一衿亦足慰親心知 公者多  
慨惜此其僅於鬻序蜚聲終未獲售也 公性凝重淵默樂善有  
豪俠氣鄉里多其能遂舉爲村正嚴立村規首創社倉息穀法人

皆稱善其頹圯祠廟爲村人祈報所者靡不規撫而整齊之村故濱汾沿河村落資河爲生介於靈霍間者計二十餘處故事沿河縣屬各有水程以平陽駐防騎兵濟軍用也自南鎮撤平介上游遂相率穿渠厚障非盛夏雨漲終年無水霍郡苦之靈石尤甚及兩縣與平介爭水屢不直 公憤極襆被謁省憲爲沿河村民訟訟卒直霍民重德 公釀金鑄河流均霑匾額以表高行焉石櫃故古石曲渡縣境濱汾六渡之一爲省西部循隰赴河東路 公夙憫夏秋水盛行人往往覆溺特倡募築橋以利濟迄今出其途者咸頌 公不置蓋其好義勇爲賦性使然也先 公嘗延上舍王耀南設帳課子姪時上舍逾知命似續猶虛亦自以清貧弗計也 公陰物色之竟爲匿購姬人置其家比連舉兩子均皆成立微 公力若敖之鬼終餒矣歲戊午舉辦村政縣宰首以村正上

公最大憲廉其賢仍畀以村長職叠辭不獲於時適奉興學令  
公以道美忝列四鎮是不可使獨無高小校爰集近里薦紳謀  
僉曰善道美設學自 公始十年來由斯校升學置身政學界者  
蓋比比也村某氏子才儁而 公聞以貧將輟學爲助給修膳資  
上進卒得考升師範畢業而擁皋比焉宏獎後學士林多樂道其  
事 公主村事近三十年非義弗爲行義若失凡所施爲必謀諸  
衆而後行而亦無不悉當人意古所謂一鄉之善者非歟士君子  
雖未獲信爲世用而陰德及人視臚仕歿則已焉者其相去爲何  
如哉晚歲 公感族姓繁衍歲時祀宗祠于道美蘇溪之頻勞深  
懼歷世遠而後人愆禮也慨撥共居數棟獨營繕家廟敬念宗祊  
報本啟後之心穆然遠矣至鑿池蓄水備河涸衆汲也樹木固堤  
防暴漲冲刷也他如栽桑藝果事細弗縷書 公素健強飯識者



咸稱期頤壽乃大董甫臻少微遽隕以民國既建之十六年歲在  
丁卯九月十八日卒於里第春秋七十有二孺人德配郭繼配張  
側配劉繼配任均先 公卒 公舉男女各二人長男長女爲德  
配出次女繼張出次男步庭劉出早世娶郭再娶王遺幼孫樹吉  
殤長孫彬吉爲 公長男步蟾元配郭氏生山西大學工科肄業  
娶河津蘭梅五君女 公長女適趙次適吳均縣中著姓步蟾簡  
任職山西實業廳科長現娶河津光緒丁酉鄉解阮公明生女生  
孫男一殤茲步蟾謹卜戊辰年四月十五日葬 公于村北高原  
嗚呼賢哲有後典型安仰而基與步蟾居同里歲同庚早歲又共  
硯山西大學堂溯自辛丑廻變學使者始按行科歲試先後以案  
元入泮故同赴徵焉會其由大學積分考上第賜舉人明年應廷  
試遣派留學英倫實爲山西第一次獲選西洋高才生洎省垣同

官值休沐恒過從無虛日自愧一官匏繁濫厠警曹夙昔久稔

公之行誼維樞魯無文謹舉足以風世而爲來許告者誌之爰爲  
銘曰

冠爵津南陰地關曲汾流孕育誕生賢哲維民之望爲家之光  
人思宿處行比一鄉我生公後夙慕公德有典有則成已成物  
長橋石渡不朽千秋風高拜井克媿前修與公喆嗣契託苔苔  
敬勒貞珉億萬古今

楊銘佐之妻王氏節孝碑記

清翰林院庶吉士平定蔡 侗

昔湛若水之母孀居四十餘年端靜嚴潔如一日既老雖至親卑  
幼之請謁見之未嘗踰閫後若水貴顯祿養備至而縞衣蔬食不  
改其初見者不知其爲太夫人也嗚呼賢矣今按王節婦行略其

父掄元爲清季名孝廉幼嫻庭訓嚮笑不苟年十九來歸銘佐未三十而寡旣無子女亦無家產勸者屢欲奪其志而節婦指天立誓不易柏舟之操家徒四壁而藉十指之勤劬以養天年雖飲冰茹蘗不易初衷其志定其節堅也至今年逾五十動履猶循規則一跬步必慎一出言必謹雖里社報賽婦女麕集而節婦未嘗涉足輕往焉即子姪輩之晉謁不數語而退從不聞其笑言啞啞也故族人欽其壺範憫其節苦皆願奉養焉初依夫弟銘鼎者二十年後銘鼎物故近依銘鼎之子璟以度日莊嚴貞靜老而彌篤是節婦之操行非即今之湛母乎其性同其操同其動履必謹亦同獨是湛母有詰嗣而節婦無子以顯揚之湛母有祿養而節婦無產以養贍之是與湛母同其苦不與湛母同其樂彼蒼者天亦若特設此艱苦之境以磨勵斯人以爲不如是不足以見其堅貞也

洵巾幗中之完人宜乎湛母流芳於前而節婦媲美於後矣今覲婦之族姪昇好義之士也目擊節婦之清操不遠千里走書丐於余余舊史臣也職在闡幽故撮其梗概勒之貞珉以愧後世之爲人婦而更事二夫者

清授文林郎耿公耀彩誄文二篇

其一

河津縣承政員邑庠生 陳紹祖

耿氏爲吾邑望族早歲久耳 公名以相隔甚遠未獲一造其門

惟聞士林嘖嘖譽 公弗置心籍慕之會丁卯冬桂亭鄉台以其

先公事略見示披覽之餘不禁肅然嗚呼 公渺矣其碩德懿行

流傳弗替將與河山並壽迴憶邑中縉紳半皆宿草 公又繼焉

能無山頽梁壞之感乎爰爲誄曰胡天不弔大雅淪亡老成彫謝

鄉里傍徨成人有德小子有造飲水思源口碑載道弓冶無恙箕

裘永固有子克家益昭德裕我儀其型徒殷嚮往臨風追悼曷勝  
悲惋

其二

清賜進士出身翰林院編修

解榮輅

萬泉人

前史官解榮輅曰耿氏之在平周其族有三而耀彩先生實居右  
族使其自入泮宮奮翮青雲爲國宣勞則其政治經濟當必有大  
可觀者而惜乎其方青一矜學業遂從此止境也雖然先生之不  
幸實靈人之大幸也假令先生列黃榜登仕版垂紳搢笏輔贊昇  
平則四海被澤億兆蒙庥靈人之受教化未必能若是之親且切  
也惟其本經綸天下之才之識而約之於一鄉推之於一邑長材  
短馭取精用宏而靈人乃得受先生之羽翼提携至於今而人心  
之愛戴若歷久彌新者論語隱居以求其志行義以達其道先生  
殆隱居以求志者乎今先生之子步蟾方將繼先生之志述先生

之事推廣吾晉農鑛事業不遺餘力先生之澤行將普遍於三晉又豈僅靈人之幸矣哉步蟾與余戚誼也因得常謁先生候起居見其長身玉立溫文爾雅及臨事則斬釘截鐵毫無假借義之所在一介不苟嗚呼此先生之所以爲先生者歟

民國戊辰春三月

璽潤張老先生八秩晉二壽序

王承基 邑人

夫盛德之胄必秉異資積善之家克昌厥後當此物換星移之際乃有涓濱商隱之倫以代天功以彰人紀蓋叔世之逸民皆興國之人瑞矧大德者必壽矢勤者延年維其履貞蹈和用克祈天永命眉黎羣鮒古有明徵張氏爲縣城著姓奕世載德清節傳家粵稽善繼善述之休彌欽構室構堂之志一門和藹九族冲融豈待字書百忍矜式閭閻會看善積三千比齡旗翼是以集儒修於冢嗣顯英彥於孫枝獲天之佑豈偶然哉爲人所師良有以也吾友

惠生大哥以鈎河摘洛之才綰會計度支之鑰心盟白水人仰清  
風乃大衍晉四之歲正椿庭杖朝之年庚老共羨婆娑伏波猶形  
矍鑠今歲己巳二月二日爲封翁璽潤老伯八旬晉二攬揆之辰  
某等 或誼切友好或居近梓鄉愧少橘頌之詞聊進麥邱之祝人  
第見優游歲月竺屋康疆而不知涵養性天精神活撥雙瞳炯炯  
早識壽相之成七葉緜緜行見文孫之貴敢獻數言藉當三爵伏  
希一粲晉祝千秋鄉愚晚某某等敬祝

重修道美通濟橋捐啟

耿步蟾 邑人

伏以橋臨孔道原資行旅之往來而地屬宗邦尤覺桑梓之繫念  
吾邑靈石道美村村北舊有石橋名曰通濟控南北之通衢供車  
徒以利濟夫旣爲行人所攸賴正宜及歲時而勤修乃自清雍正  
迄今幾三百載代遠年湮風饕雨蝘雕欄十二頓驚蛟螭之改觀

石鼎志 卷之一  
五十一  
鐵弩三千難禦洪濤之破在於是雁齒零星虹腰臥月隔一水之  
煙波牽牛不渡殘六橋之花柳司馬倦遊爰由村紳協議重修而  
就商於余竊念是役既關路政又係祖居蓋余十世祖前曾籍是  
村建有耿氏宗祠族人環而居者至今無慮數十家以故自余幼  
時即熟稔該橋之規模雄壯利益宏深則今之重修倡募義何容  
辭惟工程浩大而村小力微況社會拮据又農傷穀賤伏願 大  
雅名流各方善士量力捐貲望鑑銖之不吝存心利物亦銜結之  
同深如蒙 惠助請著 冰銜謹啟

山西水災籌賑會募捐啟

王承基 邑人

在昔神堯御宇之年水患曾經九載良以治世之災允爲祥瑞故  
周官設鄉師之職漢代有除租之文流離堪矜艱阨宜賑頒內帑  
於中樞生成共荷爰廣募於郡衆棉薄奚辭本年麥秋之交淫雨



兼旬河伯肆虐旣汾水之溢流復文峪之暴漲雁塞朔南滹沱與  
桑乾出險龍門上下黃流與洪絳爲災合經環而盡成澤國并田  
舍而悉付波臣哀鴻遍野誰憐無告之民穴鼠何依夢斷遠征之  
客慨千家之百存亦十室而九空止觸目沙封里閉虹樑宛在水  
中地盡泥塗蝟刺僉敷石外膏腴變爲沙磧墟落半屬陂塘戶斷  
炊烟向誰乞勺人皆露宿何處棲身詢諸各屬父老百年無此奇  
災日觀顛連五內有如芒刺誰繪鄭俠之圖急籌富公之策同人  
等憂心如焚請命弗遑旣竭極施之忱特邀殊恩之沛集粉墨以  
登場豈徒奏技選燕鶯而執役原籍輸將雖杯水無濟於車薪而  
蹄涔可濡夫轍鮒况近幾同罹浩劫尙來告糴之文西秦兵燹之  
餘難施泛舟之役當茲節屆隆冬朔風砭骨特恐田開續命莫慰  
衣稜所望守土宰官悉效金帶之投鄉里薦紳共襄狐腋之集推

已飢已溺之心抒救苦救難之願更願中華南北各省慈善大家  
廣行勸募各發宏慈俾災黎十萬共上春台庶善行三千功德無  
量也已特茲乞 施敬佈

詩

唐

南出雀鼠谷答張說

元宗

雷出應乾象風行順國人川途猶在晉車馬漸歸秦背陝關山險  
橫汾鼓吹頻草依陽谷變花待北巖春聞有鷓鴣客清詞雅調新  
求音思欲報心迹竟難陳

扈從南出雀鼠谷

張說

預動三靈贊時巡四海威陝關凌曙出平路半春歸霍鎮迎雲輦  
汾河送羽旂山南柳半密谷北草全稀遲日宜華蓋和風入袷衣  
上林千里近應見百花飛

奉和聖製同二相南出雀鼠谷

張九齡

設險諸侯地承平聖主巡東君朝二月南旆擁三辰寒出重關盡

年隨行漏新瑞雲叢捧日芳樹曲迎春舞詠先馳道恩華及從臣  
汾川花鳥意並奉屬車塵

前題

宋 璟

秦地雄西夏唐風壯北圖禹行山啓路舜在邑爲都忽視寒暄隔  
深思險易殊四時宗伯敘六義宰臣鋪徵作宮常應星環日每紆  
盛哉逢道合良以致亨衢

前題

蘇 頲

雨施巡方罷雲從訓俗廻密途汾水衛清蹕晉郊陪寒著山邊盡  
春當日下來御祠元鳥應仙仗綠楊開作頌音傳雅觀文色動台  
更知西向樂宸藻協鹽梅

前題

袁 暉

魏國山河險周王警蹕廻九旗雲際出萬騎谷中來石路行將盡

烟郊望忽開賞矜垂柳報春畏落花催興逸橫汾什恩褒作頌才  
小臣瞻日月延首詠康哉

前題

席預

鳴鑾初幸代旋蓋欲橫汾山盡千旗出郊平五校分前林已暗景  
後壑尙寒氛風送簫韶曲花鋪黼黻文鹽梅推上宰禮樂統中軍  
獻賦紆天札飄飄飛白雲

前題

王光庭

省俗恩將徧巡方路稍廻寒隨汾谷盡春逐晉郊來雲騎轉行漏  
烟旂引從臺惠風初應律和氣正調梅雅頌通宸咏天文接曙台  
霸陵桃李色應待日華開

前題

徐安貞

兩臣初入夢二月扈巡邊澗北寒猶在山南春半傳頌聲先奉御

靈石縣志 卷之十 五十五  
辰象復回天雲日明千里旌旗照一川柳陰低御輦草色變新田  
還望汾陽近辰遊自杳然

前題

崔翹

硤路繞河汾晴光拂曙氛笳吟中嶺樹仗入半峯雲頓覺三原盡  
平看邑里分早行芳草迴晚憩好風薰嘉頌推英宰春遊扈聖君  
共欣承睿渥日月照天文

前題

梁昇卿

何意重關道千年過聖皇幽林承睿澤閑客見清光日御仙途遠  
山靈壽域長寒烟入晉薄春樹隔汾香國佐同時雨天文屬歲陽  
從來漢家盛未若此巡方

前題

張嘉貞

天賜我宗盟元戎付夏卿多材兼將相必勇獨橫行經緯稱人傑

文章作代英山川看是陣草木想爲兵不待河冰合猶防塞月明  
有謀當擊醜無戰且綏氓闔外專三略雲中冀一平感恩同義激  
悵別屢魂驚直視前旌制遙聞後騎鳴還期方定日復此出郊迎  
汾水繞關斜自怯春寒苦那堪禁火賒

崇徽公主手跡

李山甫

一拓纖痕更不收翠微蒼蘚幾經秋誰陳帝子和番策我是男兒  
爲國羞寒雨洗來香已盡淡烟籠著恨長留可憐汾水知人意旁  
與吞聲未忍休

明

過韓侯祠

于謙

靈石縣志 卷之十 五十六  
躡足危機肇子房將軍不解避鋒芒成功自合歸眞主守土何須  
乞假王漢帝規模應豁達蒯生籌策豈忠良荒墳埋骨腰山路駐  
馬令人一嘆傷

介子廟

謝榛

綿山憶介子歿後幾千春獨有英明主終憐患難臣蒼葭餘古燒  
悲鳥自荒榛歲歲逢寒食其如惆悵人

和王公濟過韓侯嶺

常倫

漢代推靈武將軍第一人禍奇緣躡足功大不容身帶礪山河在  
丹青祠廟新長陵一坏土寂寞亦三秦

綿上怨

李東陽

五蛇上天一蛇蟄綿山經月火不滅君侯恩重翻作仇不如放在  
山中囚君侯有臣亦非少貪天之徒但不保臣心見母不見君誰



言母死非君恩今晨何晨夕何夕留與千秋作寒食

淮陰侯廟歌

王世貞

咸陽傾城葬祖龍嬪嬙掩泣千花紅十二金人銷不盡揭竿斬木  
飄於風是時韓生業釣者其志固已無山東轅門執戟重瞳子巴  
蜀爲壇隆準公白帝雄圖久成滅烏江獨馬非爲功歸來故鄉高  
築宮黃金如山一日空齊趙諸侯在指掌俛仰宇內無英雄三奪  
軍權再被縛束手不待如發蒙迺知天授豈人力代相之約何匆  
匆當時幸不烹蒯通嗚呼餘子焉足數往往鐵券埋膏斧驪山刑  
客布平王長安徹侯噲等伍微時猶營萬家墓貴日翻慳一坏土  
尙令黃河羞漢帶日夜崩濤奪征鼓乍可吾徒設瓣香莫令兒輩  
陳牲醑荒堦突兀見老檜乾坤榮榮日漸吐五陵王氣橫亘天亦  
復寂寞成今古

靈石山行

高叔嗣

長路天俱遠高山日易昏強餘疲馬意垂首戀君恩

介山

韓邦奇

十里綿山一炬灰龍蛇歌罷益堪哀卞和泣抱荆山玉不獨當年

介子推

抱腹巖

韓邦奇

崔巍峻嶺與雲連梵刹宏開際碧天佛殿有風金鐸響石巖無雨

綵旛懸優曇砌上花香馥祇樹林中鳥性禪信是空王有靈異祥

光絢耀起前川

介廟

許讚

貪冒天功義豈安清風千古肅衣冠瓣香拜下瞻祠樹汾水綿山

六月寒

謁介廟 二首

楊 巍

每於青史想高風  
故里經過涕淚中  
欲弔當時栖隱處  
滿山殘樹夕陽紅

幾年狐趙共艱難  
一死夷齊伯仲間  
落日荒祠汾水上  
行人猶說晉河山

謁介廟

黃洪毗

地迥龍蛇蟄山空  
玉石焚貪天慙衆  
諾真隱自無文只  
抱丹心苦難忘白  
髮恩年年寒食節  
風雨不堪聞

介山石乳泉

傅 山 太原人

佛恩滋靜者石亂  
勅龍潭菡萏瓊茄  
引摩尼玉線甘惠  
該功德八清澈法  
身三一酌醍醐足  
那伽不許貪

介林

傅 山

靈石縣志 卷之十 五十八  
青松白松十里週松青松白祠堂幽晉霸園林迷草木綿田香火  
動春秋仙名賣扇傳東海身隱承顏肖故邱還慮寒山太枯寂婉  
容開放牡丹頭

韓侯廟

駱用卿

逐鹿中原漢力微登壇頻蹙楚軍威足當躡後猶分土心已猜時  
尙解衣畢竟封侯符劓徹幾曾握手到陳豨英魂漫灑荒山淚秋  
草長陵早落暉

介廟禱雨有應

邑令 路一麟  
柏鄉人

古廟羣山裏幽林鳥道穿孤忠憂國卹遺愛軫民顛雨過沙苔濕  
雲垂澗渚連村翁勤伏臘青史信名賢

清

冷泉關道中

王士祿  
新城人

驅車臨曉發野氣望中清溪日青林豁山烟白埃明雲巒隨境換  
堡聚逐崖成到此汾河水依人覺有情

綿山弔介子

王士祿

南望介休郭青山鬱相向爲問斯何山云是古綿上子推從亡返  
托跡此巖嶂公子詎烏喙斯人自遐尙旣殊少伯逃復異靈均放  
焚林良已奇抱樹或過當疇知志士心未易恆情量誰代歌龍蛇  
其跡類怨望棲隱倘不終懼爲高人謗田光齒利劍瀨水沒清浪  
所貴明一心何能畏死喪嗟彼苟且人浮沈詎爲曠

冷泉關道中

王士正

新城人

南經雀鼠谷崎嶇殊未休路隨千嶂轉峽束一川流灘急長疑雨  
蟬嘶畏及秋雲峯將落日立馬迴含愁

介山

王士正

驅車綿上聚懷古綿上田授璧事已遠遺蹟今虛傳晉國昔多難  
公子實大賢五蛇爲之輔一蛇獨耆乾身隱竟焉文狐趙羞比肩  
逃榮誼固高報德理亦然徘徊望忌坂落日無寒烟何人貪天功  
嗟哉南內年

韓侯嶺題壁

王士正

烏喙那堪共良弓久自藏一軍驚大將千古痛眞王勢已歸諸呂  
何勞守四方世家誰載筆讀史淚沾裳

冷泉關

趙執信

益都人

霜凝疎樹下殘葉馬踏寒雲穿亂山十月行人覺衣薄曉風吹送  
冷泉關

曉過靈石

趙執信

曉色依微嶺上橫望中雲物轉淒清林收宿霧初通日山挾迴風

盡入城客路遠隨殘月沒鄉心半向早寒生驚鴉滿眼蒼烟裏愁  
絕戍樓橫吹聲

過仁義驛

吳 雯

蒲州人

古驛藏深谷盤迴到水涯芙蓉秋澗葉蕎麥晚山花徒倚青藤杖  
縱橫白鼻騮蒼崖土五色或可就丹砂

郭家溝

吳 雯

雨後山更佳石橋集孤想鳥下綠烟中人行紫泥上

宿靈石

吳 雯

樓外一樹高水邊衆星濕獨親燈火明不覺風雲入

題索洲壁

吳 雯

沙磧見鷓鴣蟲聲亂禾黍白雲遶棟飛昨夜東山雨

過冷泉關

沈 廉

河山莽蒼蟠龍起銀濤寒噴關門底樹禿烟消鳥影稀荒雲零亂  
殘陽裏三年攬轡往來頻如弩西風吹倒人茫茫北控并州路此  
地誰言非要津

憩蟠龍庵觀空閣

沈廉

閒雲澹無語留我息塵襟山意寒將雪泉聲冷入琴高懸空處眼  
清見此時心日暮珠林杪香風引梵音

過仁義驛

沈荃 華亭人

層嶺鬱岩巒盤紆望轉勞雲垂大壑暗雪積亂峯高畝畝依壠坂  
人家半穴陶駢駢行役者未敢學盧敖

過靈石

沈荃

岸束廻湍急沙虛疊石懸輕霞初冠日遠翠欲浮天鵲噪巖間樹  
人耕嶺上田前溪渡馬處碧水自潺湲



上韓侯嶺望霍山

沈 荃

驅車上高山山高苦登頓重岡既盤紆脊嶂復竊峻晨曦戒修塗  
亭午尙前進崩沙臨大壑下視幾千仞徒懷叱馭心恐負垂堂訓  
遂造此峯頂呼吸帝座近還謁韓侯詞颯颯英風震東南望霍山  
峇嶷指中鎮積雪冒寒空層雲起膚寸睇目浹幽襟放情祛鄙吝  
飄飄物外情安知徒旅困喟然發長謠天風吹短髻

蟠龍庵

田文鏡

癸卯六月奉  
旨散賑於平汾借搗靈石之蟠龍庵愛其結構宏敞房廊

幽邃詢其所自禪悅上人之手建也經營三十載約費千  
金誠未易易今上人已圓寂矣作此誌之

獨據溪山勝支公此結庵地偏開草棘心自闢精藍力大齊龍象  
名香比鉢曇我來看手澤重啓藏經函

望綿上弔介子推

方士模

拔地蒼崖起岿巖畫碧天晦明秋色裏磅礴暮雲邊白骨旌何補  
青烟禁尙傳幾時一藤杖憑弔倚層巔

過李衛公祠題壁

吳挺

曾向虬髯傳裏尋只今遺跡感知音書生亦有封侯骨幕府應無  
得士心肯負蛾眉雙眼俊輸他頭血一囊深稗官寫盡英雄意憑  
弔荒村泪滿襟

再過小水鎮題壁

吳挺

火雲堆裏太原遊又逐西風向水頭下馬重尋山寺碣開囊獨上  
酒家樓塵沙徧灑英雄泪草木先知天地秋可惜兩番攜劍過更  
無人與說恩讐

韓侯墓

平陽守 章庭珪 會稽人

路轉山迴行復住下馬來拜韓侯墓韓侯已往孤塚存風雲常護

嶺頭樹功高震主易生疑鳥盡弓藏悲晚悟千秋遺恨惜英雄不  
聽剗通非自誤春風秋月兩茫茫長樂宮經中幾度吁嗟乎淮陰  
河畔釣臺旁遺廟依然思老嫗微時尙感母恩深達後豈負君心  
注傷哉赫赫漢功臣一旦危疑等朝露

李衛公祠題壁

邑令任

楓

汝州人

混沌龍蛇未易勘李郎猶不識張三若非俠女懸孤鑑那得英雄  
聚一龕將相宗工依日月海天王氣震烟嵐祇今汾上低頭拜雲  
樹光芒照碧潭

仁義驛阻雨

任楓

鎮日蕭蕭雨郵亭解佩刀長官肫破炕饑馬嚼空槽已被微名誤  
難言穩臥高吏人且散去吾意寄酩醕

途次迎謁感懷

任楓

纔出輪蹄捧壩間  
藍輿復度冷泉關  
斷崖枯草隨汾水  
殘雪斜陽見介山  
氣味渾如湯火急  
風塵那是簿書閒  
艱難撫字終無濟  
嵩少丁寧採藥還

早發界口

任楓

十旬九未歇  
驅馬又霜臯  
寒重山支骨  
風淒樹落毛  
栖栖常在道  
僕僕似何曹  
祇覺溪崑畔  
閒雲笑我勞

宵征

任楓

誰喚黑甜裏  
披衣却出城  
風塵吹病色  
鐙火照宵征  
山睡雲高臥  
星搖河碎明  
駢回天未曙  
倚馬待鷄鳴

夏門道中

李先達

峭削夏門道  
疏排禹力神  
沙寒流水急  
石亂野橋新  
仄徑猶容馬  
窮椒尙住人  
清風攜滿袖  
肅穆小陽春

韓侯墓

巡撫伯麟

滿洲人

磊磊嶺上石鬱鬱澗邊樹寂寂空山中兀兀韓侯墓殞首長樂宮  
瘞衣靈石路誅茅丹牖開粉壁多題句溯自唐宋來議者難更數

史遷為漢臣微詞差足據

太史公傳贊謂其不矜不伐庶幾於漢家勳可比周召天下已定乃謀叛逆此

史公微文不敢顯言者也淮陰不叛於垓下未會之先豈叛於天下已定之後唐宋以來議者紛紛究不若以漢臣論漢臣可為定論也

又或摘其疵功成身不去即從赤松遊亦如潭影度傷哉土一邱

魂兮豈久住積雪滿巉巖寒鳥啼朝暮眞王及假王成敗歸何處

謁韓侯廟 二首

按察使朱紹曾 上人

三分割據勢方成不肯乘危聽蒯生誰道異謀萌末路君侯心跡

自分明

巍巍陵廟枕山邱道路人猶說項劉賸有英名今不朽相君原只

合封侯

韓侯頌拜淮陰侯墓

學使黃鉞當塗人

嶺上涼風颯若秋我來繫馬拜荒邱羸顛劉蹶今何有不及茲山屬故侯

靈石縣觀隨開皇十年所獲靈石石文大道永吉四字已磨

滅不可見

黃鉞

靈石高於人磊砢若積鐵摩挲吉識文年遠久磨滅隨文幸并州

獲此縣因設開國時十年符瑞上未絕邠知妖祥興大書亦不輟

前年方雨石溢陽路隤脆明年古器妖金石且為孽開皇七年雨石於武安溢

陽間十餘里十一年正月以平陳所得古器多為妖孽悉毀之大道永吉何暗昧媿前哲史稱隋文雅好

祥瑞暗於大道如聞石有言我亦無可說惟幸王君懋靈感未臚列王邵傳紀

得石者三不及靈石靈感誌三十卷邵所撰也

神林謁介子推廟

黃鉞

綿山高不極縹緲白雲端下有神林在來從介廟觀虛堂役神鬼  
被服秉躬桓風雨靈旗動蛟螭畫壁蟠是誰加爵土強爲飾我冠  
言祿當時媿從龍此日嘆事傳壞異失節企潔清難豈有黃蘆木  
惟餘白牡丹宦無游轍至詩笑斷碑刊綿上田猶舊山中食不寒  
一家仍眷屬千載共團圓

後殿中祀介母左  
介君右介君妹

賽罷神應樂婆婆得

盡歡

### 九芝呈秀歌

巡撫 金應琦 安徽人

聖主重農桑不侈言符瑞芝呈九采鳳苞輝生向蟠龍之古寺雖  
與嘉禾雙歧合穎稍殊科要亦風雨和甘之所致若令產自大中  
祥符間應與甘露青龍同表異方今黼座宵旰勤幽風繪圖誌耕  
織珠聯璧合未稱奇僅 命史官紀其實大玉甕却自于闐奇花  
象不煩邊尉則茲古棟非草非木之奇葩要只堯階朱草翠萸之

一類當時九官四岳不聞以此贊賚颺今茲守吏儒臣豈足撫拾  
以作 盛時之鼓吹然而禎祥之來非無因此地當年况有飛來  
之石同浮泗榮光出河五老遊騶虞非時不能至將軍新唱凱謠  
回嘉名顏斯欣所值吾儕承乏守此邦乘輶問俗常停騎時和歲  
稔屢書年玉潔冰清無墨吏屈軼挺生佞無指廉泉即醴於以滋  
培而拔萃菊英延年仁壽普春酒遍飫衢尊賜山經草譜靜叅稽  
一莖九穗洵非木耳雞茵堪彷彿 聖明不貴史備書筮脯生厨  
理無二願君葵藿殷拔薤鋤非類願君切桑麻絃歌明素志他日  
政成譜入循良傳即取瑞石靈芝並作甘棠之故事

前題 步元韻

邑令 邊龍驥

任邱人

鋒鏑靜邊陲彼蒼應錫瑞將軍忽見芝草生適遇蟠龍之古寺佇  
看執醜獻馘同唱凱歌回信是天時人和之所致鬱蓂夔夔對令人



仔細參究與菅蒯歲莎姿迥異 聖人御宇慶昇平男勤稼穡女

勤織績祥奇寶禁敷陳政貴黜華而崇實草木亦盡被餘恩偶獻

祥氛於廷尉不然開皇符分此地千餘年未聞吐葩颺榮出其類

史臣紀事以直書何妨作歌誌喜以當 休明之鼓吹自愧操刀

學割爲一官絃歌雅化忝洙泗地接堯封屈軼生麟鳳郊藪時或

至當年休嘉頌比隣今日祥符適所值似勗儒臣政事勤遙臨榮

戟停車騎語出金石誨屬寮意比醇醪戒貪吏不貴異物寶惟賢

百年樹人實欲栽培而拔萃豐年美玉大臣風滿幅珠璣仁人賜

一莖九穗固稱奇咀嚼鴻詞更與禹鼎湯盤相彷彿 盛朝不侈

言休嘉因物興懷理不二勉力鋤稂莠芟夷無遺類勉力勸耕桑

淡泊以明志幸得新篇書爲座右銘即取靈芝之歌以效奉揚仁

風之遺事

韓侯廟懷古

河東道劉大觀

山東人

侯功初立侯則死萬疊青山墓前起稱冤責過劇紛紜至竟何說  
爲真是以殺無罪罪漢高藉口跋扈之臣予以誅心例例君侯侯  
有斯心早叛矣眞王假王徒區區鄴侯留侯但爾爾書生泥古發  
迂論聚訟築室應寒齒耿耿千秋一疑獄誰畧其跡究其理井陘  
白骨化青燐垓下紅顏沈碧水誅戮過多古所戒自來名將多如  
此責侯而侯未必怒稱侯而侯未必喜平生飲酒讀漢書抑揚贊  
嘆多微旨太史公筆自沈痛蕭何曰信是國士安劉者勃書牘背  
隆準兒孫亦委靡雲夢烟霞屬魏晉未央宮闕埋沙滓今向秋風  
拜侯墓斜陽欲墮嵐光紫

蘇溪題壁二首

劉大觀

雞犬桑麻含靜穆樓臺礮壑著離奇  
霍雲綿雨自千古別有桃源

人未知

遙峯蘊藉近峯迺峯下祠堂惠潔侯一線路從溪上轉野花妍麗  
水聲幽

韓侯廟 二首

學使 陳嵩慶 杭州人

烏盡弓藏悔已遲眞王頓足事先知劇憐雲夢成禽日翻羨淮陰  
乞食時貴不可言空復爾鬼能爲厲欲何之於今霜草斜陽路誰  
向荒墳奠一卮

慷慨登壇事業陳一軍驚後更何人若令伍噲非知己至竟安劉  
失老臣漢時西封殘碣古秦雲南望野花春靈旗盡日清風卷回  
首關山爲愴神

謁韓侯廟

林 芬 大興人

五年重過嶺下馬拜韓侯國士祠千古眞王土一邱靈旗翻月冷

野殿帶雲愁往事向誰說蕭蕭山樹秋

韓侯廟

鄭賜圖

福建人

漢室滄桑竟若何巍巍絳帳俯山河千秋國士餘坏土一代眞王  
嘆逝波報德兼金方撒手仇功深殿已投戈而今莫問升沈事暮  
雨雲旗冷薛蘿

李衛公祠

張應辰

汝州人

祠宇蒼涼傍路塵丈夫巾幗各精神美人去後青山在俠客名留  
古驛春虎嘯海隅分一局龍攀日角露全身至今萍水成佳話誰  
是當壚舊主人

淮陰侯祠

張應辰

垓下誰收逐鹿功將軍旗鼓失重瞳但看徙楚訓漂母豈忍乘危  
聽蒯通百戰河山秋草外千年祠廟夕陽中可憐國士成弓狗底

用登臺唱大風

韓侯廟

方坦

桐城人

把釣誰相顧登壇衆所尊豈知眞國士即是餓王孫不聽三分策  
猶懷一飯恩嶺頭祠宇在千古祀忠魂

韓侯廟懷古

張崇型

松江人

君侯節概如嶺高論功豈直蕭與曹侯死嶺存傳不朽至今過客  
思英豪憶從落拓淮陰路仗劍胸中森武庫一飯且教漂母憐片  
言旋啓滕公悟無雙國士得時難委任權專上將壇北平代兵不  
釋甲東拔趙幟方傳餐身歷疆場數十戰謀出全師驚奇變垓下  
名雖看獨雄關中失鹿知誰擅齊軍易取心難收書傳躡足嗤留  
侯假王信洽臨淄衆眞王疑成雲夢遊佐得新朝一疆界走狗將  
隨狐兔敗獻策何曾怨蒯通雄心未免羞樊噲時乎一去不再還

倉猝禍生長樂間剩有衣冠營舊塚長留祠宇伴空山停車瞻仰  
慚形穢慨息靈旗搖影碎侯不見鷗夷載月逃海濱自古成功宜  
引退

謁韓侯廟

羅筠

可惜淮陰不世才登壇轉戰疾如雷權歸大將驚雄敵爵拜眞王  
起禍胎策謝蒯生非失計厄逢呂雉有餘哀中庭握手誰聞語司  
馬傳疑見史裁

介林

黃憲臣

南海人

一逕入松柏週漕翠影重挈風疑嘯虎爪石欲蟠龍死占峯千疊  
生逃祿萬鍾如何名忌坂廻看碧雲封

度韓侯嶺

三首

黃憲臣

峭壁俯塵凡鞭絲影半銜嵐光隨馬足日色冷征衫徑折蛇蟠磧

崖飛石作帆松楸露祠宇隱隱在層巖

至此停驂下韓侯有古祠風聲迴巨壑雲氣擁靈旗骨挺蒼松勁  
心懸白日知微文司馬筆聚訟更何爲

嶺峻覺天低憑欄極目迷連峯界南朔終古走輪蹄國士青山在  
詩人翠壁題不堪追往事長嘯下荒谿

登秦王嶺

黃憲臣

黃轉盤紆界碧空嶺頭曾捲義旗風斜陽馬跡荒榛外殘雨龍吟  
絕壑中地劃雄關汾霍斷雲開闕道鬼神通至今谷口無尋處故  
壘蕭蕭虎豹叢

謁介子廟 二首

黃憲臣

身將隱矣又焉文瞻拜遺祠重感君豈有龍蛇悲抱樹應隨猿鶴  
早離羣松濤萬壑喧秋瀨草色千年弔夕曛底事蒙莊逞奇論

抱樹

焚死乃莊子寓言 空令烟火冷并汾

綠陰十里枕孱顏心寄春秋獨往還河上君臣慙白壁林中母子

占青山旌懸峭柏長松裏祿及荒塍斷隴間我度巖扉叩眞宰碧

雲冉冉水潺潺

聞邑人極談拖腹巖之勝詩以紀之

黃憲臣

誰劔山腹禮空王積雪春猶冷上方峭壁烟雲雙屐起虛崑燈火

一龕藏龍降遠礮潭心靜蜂簇奔泉石齒香

地有龍潭隔數里許有蜂窠泉泉自壁間

出如蜂窠然

鐵索幾時梯絕頂

鐵索嶺名

西風倚劍厲寒芒

觀瀾亭小集二首

黃憲臣

濕翠擁山城尋幽別趣生谿烟昏日色巖樹隱秋聲馬倦低奔櫪

鷗閒遠赴盟憑欄欣所適高論午風清

小亭臨驛路淹日不聞喧水色醒塵眼山光落酒樽振衣秋雨脚



剪燭暮雲根句索風簷久都忘夜月昏

甲戌秋王幼海以靈石懷古四詠石刻見貽作此寄題

黃憲臣

石揚貽予第一紙

時予攝沁篆蒙以石刻新搨第一紙見寄

古懷迴薄下蒼冥眼從曠

代開雙炬墨蘸空山慄百靈憶昨臨流同漱玉

是歲夏曾同遊晉祠

即今詠

史獨留青何時策馬登汾嶺日暮捫碑上驛亭

秋七月同遊柳林返怡署中新得桂花小酌賞之適稷山張

嵩樓至談飲樂甚遂成一律

黃憲臣

柳林乘興手同攜又向名花畫裏題移得小山秋院外招來明月  
石欄西一樽影動飄金粟萬斛香浮碾玉犀不速客來增逸興濃

薰鼻觀醉如泥

韓侯嶺

四首

謝玉綵

長沙人

到此登臨便不平何當國士嶺頭名東來一派汾河水流近山南  
咽有聲

荆榛鬱律白雲深靈石高原自古今怪的行人都立馬爭聽村叟  
說淮陰

一山風雨滿靈旗莫怨陳平躡足時不是奇才身不死功高原有  
漢王知

假王何必問前因自古英雄不愛身舊壘至今留此地未央宮殿  
久成塵

韓侯墓 二首

周貽組 桂林人

烏盡弓藏劇可哀古今一轍劫成灰眞王至竟餘邱壠不及求仙  
僻穀回

代北平來備遠謀祇期炎鼎鑄千秋銅駝春草今荒沒歌祀曾如

死士頭

署中立秋和千波韻

劉士望

汾陽人

無端榮落是桐陰一樣驚秋旅客心  
新雨乍收殘暑盡曉風才送  
晚涼深河汾怒激三千騎歲月啼消十二禽  
讀罷歐陽中夜賦幾  
迴酒思豁胷襟

九日清涼寺登高

劉士望

秋風匹馬一登臺萬壑  
蕭疎瞥眼來山寺憑高霜氣重人烟低護  
午晴開飛鴻南逐汾流去積雪東分介嶺迴  
明月滿川歸路晚酣  
歌應笑玉山頽

前題二首

崔作霖

寧河人

每逢佳日慣登臨策杖紛投祇樹林  
幾朵菊花高士品四山秋色  
旅人心再三游賸鴻泥雪重九寒添雁戶  
碣拚不感懷偏覽勝衛

公祠畔草深深

清霜紅葉點平蕪  
暢好遊踪與昔殊  
座上恰逢人送酒  
客中兼少吏催租  
一年風日惟今美  
故國茱萸遍挿無  
不盡醉防歸不得下  
山還倚短童扶

靈石著齋

周士本

山陰人

翠屏矗立小齋東  
上有巍峩舊梵宮  
一片摩天雲外影  
開窓青落硯池中

九日清涼寺小集

周士本

蒼巘琳宮迥絕塵  
登臨同喜醉良辰  
黃花影裏飛觴急  
紅葉聲中得句新  
萬疊霍雲連日脚  
一灣汾水抱城闌  
何須遠赴龍山會  
眼底秋光正可人

九日清涼寺登高

王志滸

華州人

霽日登高盡一觴安排眼界入清涼雨深石井泉心綠秋在僧樓  
樹頂黃簪菊每教懷杜牧題糕端底讓劉郎

謂劉星堂詩先成

滿堂絲竹

歌明月留與山中說酒狂

夏日登郭外古祠遇雨

王志湑

郭外叢祠十丈臺千家閭閉望中開最宜清話羣山繞恰遇追涼  
片雨來韓嶺遠遮雲似幕汾流忽送浪如雷城中招飲催歸去路  
滑斜陽踐碧苔

壬申九月十日登郭外古祠

王志湑

節過重陽雨始停層臺對酒俯郊坰霞飛晚堞連山紫水積秋烟  
漾樹青立意登高容我補放懷醉語笑神聽連朝雅集詩成卷都  
付張髯上畫屏

冷泉曉行

王志湑

靈石縣志 卷之十一  
早起驅車出冷泉秋容雨後靜堪憐淺流小艇人爭渡疎樹平岡  
屋有烟杭稻登場農事樂江湖懷遠雁聲傳故園三徑浮雲外籬  
落誰家菊正妍

丙子九日清涼寺載酒登高

王志活

寺樓閒靜見秋眞歲歲登高不厭頻紅嘴鴉喧颿葉樹白頭僧熟  
愛山人片雲似送催詩雨斜月仍臨漉酒巾燈火照歸岩下路馬  
蹄谿水石粼粼

靈石署中秋夜即事

王志活

窗明庭院上燈初秋霽衣輕意藹如飯罷兒童聊作劇政閒兄弟  
共攤書泉鳴遠瀨山痕靜雁度新蟾樹影疎一醞微醺鄉思動故  
園應已菊盈除

立秋後一日遊清涼寺和黃次臯韻

二首

孫貽謨

六合人

才拋酒椀又山遊脫帽雲光醒醉眸藤杖人支雙屐滑玉簪花占  
一庭秋舌甘泉味頻調茗簾護鱸香不上鈎聞有涅槃遺像在老  
僧相對說從頭

名場廿載悵緣慳近日方參夢覺關饒有面塵羞白髮幾將手版  
負青山重來約踐秋風裏前度詩留粉壁間俯視郵亭車馬織紛  
紛都讓老夫閒

嘉平廿八日由霍州回邑

邑令 王志融 華州人

勞勞車馬轉羊腸歷歷慣風塵未覺忙那有吏才成善政轉因年景  
念窮鄉野烟窰賣寒山酒曉日駝鳴古驛霜永夜叨陪賢刺史歸  
來言語繫思長 謂崔省齋先生

深秋出郭

王志融

女牆風緊雁行低近郭乘閒上石堤遠色暮山高寺外夕陽行旅

靈石縣志 卷之十  
野橋西柳經寒露秋同老人過中年物易齊菽穀登場麥又種愛  
他新綠徧前溪

因公至蘇溪小憩佛寺

王志瀾

臘盡寒餘澗道冰夕陽蕭寺望凌兢大松樓畔森羣岫凍竹廊邊  
見一僧爲政寬嚴原有則隨聲毀譽久無憑長官自有糾心法懶  
取樛嚴看七徵

仁義鎮驛館秋夕

王志瀾

碌碌黃塵久星星白髮增亂山烟外驛新雁雨中燈逝水年光邁  
涼宵遠夢乘何堪懷往事寥落半同僧

觀瀾亭晚眺

王志瀾

霜風蕭瑟滿晴川羈宦憑高意悵然平子遙情雙短髻安仁恪處  
幾流年寒潭影靜秋無底古戍林空日有烟何事人間閒歲月往



來銷盡馬蹄前

因送差坐道傍野寺 二首

王志瀾

古槐蕭寺一禪秋繫馬空廊豈爲遊  
滿地蒼苔僧不見玉簪花濕  
雨才收

平添秋水漲山門碧樹人家隔岸  
邨邨得漁簑容我著一竿烟月  
釣黃昏

曹村題壁

王志瀾

野渡晨光寂溪雲日影微  
疎籬樊綠圃密樹隱朱扉  
村犬隨耕出田鳥近馬飛  
故園風景似小憩夢魂歸

觀瀾亭和次臯韻 二首

王志瀾

秋冥日高曠沈滯感余生  
得閒就朋好亭臺秋水聲  
目親松桂韻心慚猿鶴盟  
微醒立菜圃土滋風露清

君才海南秀類古言辭溫快意簿書外秋清共琴樽爲問戀鷄肋  
何如咬菜根俯仰成咲曠月上山黃昏

介子廟

王志瀾

一入空山不可尋千年祠廟樹森森居人尙戒清明火老母常依  
松柏林箕穎雖殊勞足憫蕨薇堪採怨何深恠他伯主趨功利異  
日難忘請隧心

孝文山

王志瀾

西南馬跡樹蒼蒼

謂秦王嶺今馬跡尙存

早已龍飛有代王謙讓克承勘定

後光華曾照水雲鄉成康旣歿難爲主角綺無從只一昌孝武緣  
何違儉德秋風汾水意郎當

韓侯嶺

王志瀾

背水囊沙上將威移師項羽困重圍江湖饑餓留殘喘楚漢興亡

任一揮汾嶺風寒埋骨地淮陰雲遠釣魚磯留侯不報韓王恨畢  
竟生平老布衣

李衛公祠

王志瀾

誰起祠堂晉水濱鬚眉巾幗各精神當時野店來佳客千載青山  
說美人豈有岳靈真告語憐他海伯竟沈淪風雲不少功名事灑  
落殷紅一拂春

早春郊行

王志瀾

文書堆案儘婆娑偶爾郊行倦眼搓微雪亂山迎曉霽好風高樹  
動春和連年歲稔民猶苦作吏資深愧益多幾處冰開溪水活又  
添華髮照清波

九日遊清涼寺 二首

王志瀾

溪山仙侶快同攜落葉如花趁馬蹄澗道曲臨喬木古寺門高與

靈石縣志 卷之十一 七十四  
遠峯齊公餘佳節還樽酒物外秋風且杖藜芝草琅玕蕭爽地鴈  
鴻聲過日平西

茱萸醉把一搔頭老去多情是此遊汾水白雲千古思青袍華髮  
幾年秋收殘禾黍川如掌點破烟嵐月掛鈎好事僧寮安筆研居  
然嘯傲對滄州

李衛公祠

任昌第

壺關人

荒郊下馬氣如虹邂逅虬髯仰衛公日角正思眞令主蛾眉先識  
兩英雄依光虎拜神京北望氣鯨飛渤海東賸有小祠臨驛路幾  
回搔首弔西風

淮陰侯墓

梁繪章

邑人

登壇拔幟樹奇功扛鼎重瞳霸業空秦鹿當年歸漢帝將星從此  
落王宮山陵不老英雄恨恩遇難忘國士風聞說嶺頭遺塚在行

人感嘆夕陽中

汾漲

梁繪章

一朝風雨急千澗湧洪流浪激奔危石波翻撼畫樓漫漫邨徑沒  
隱隱野廬浮羨煞西山侶柴扉在嶺頭

淘荳葉

悲貧民也

梁寅魏

邑人

彼何者婦西風蹀躞朝淘荳葉暮淘荳葉跣脚垢面河干屢涉路  
逢鄰家女伴欲訴先嗚咽嗷嗷入口山田犂确寡所入雖然終歲  
勤動可憐身上無襦盎中無粒淘荳葉敢畏衣裳濕來歲青黃藉  
以接叶嗟來歲青黃藉以接

瑞石行

梁寅魏

河汾波浪連天白兩龍夜鬥蛟龍宅一龍戰敗伏草間兀然不動  
化爲石開皇御宇誇昇平西河郡縣多紛更偶然鑿地得此石符

分百里符嘉名君不見樊文有石嵩陽得元常難破朝堂惑唐書馮元

常傳嵩陽令樊文進瑞石天后又  
不見林州有石頌天申神文不暴石於朝堂馮元常奏為偽妄

受風霜蝕太宗即位九月林州獻頑石隱成古來英主或好奇在文曰告聖主大吉子孫五千載

官祥瑞時奏之此石成文亦不惡安見當日非相欺自隋至今幾

千載石勢嶙峋長不改分得中條一片來此中詎有神靈在不然

說法在空山生公對石開心顏假如與石談至理點頭頓悟非等

閒始信頑石真非頑嗚呼始信頑石真非頑

溪頭

何道生邑人

寂寞孤村外溪頭夕照殘斷橋迷舊地臥石響迴湍山遠看人小

林疎覺鳥寒漁翁無一語祇自解持竿

擬李衛公聞扶餘國亂定知虬髯客已得事與妻張夫人醺

酒拜賀志喜

何道生

碁局長安著已殘圖南風翻快鵬搏中原得鹿原非易絕島屠龍  
亦大難君本張翁應帝制我根李氏也龍蟠而今中外區臣主何  
日珊瑚拂釣竿

陰地關

梁 樞 邑人

南來陰地久無霜殘壁西風古戰場日暮寒鴉山色遠空留明月  
弔梁唐

魯般迤道中

梁 樞

巖巖魯般道西風送客旌霜高汾水落日出曉山明節度殘碑字  
維摩古刹名秋來無限意殘葉亂流聲

早過冷泉關

梁 樞

兩岸連山東一川雄關猶記舊唐年宵征不憚辛勤意滿地風霜  
過冷泉

千佛巖雨中早眺

梁樞

宿鳥催殘夢簾開滿座秋烟含山滴翠雨漲水添愁路滑人行少  
嵐深景自幽高樓此靜座萬象一沈浮

瑞石歌

縣尊汪稼門  
先生月課

曹誦清 邑人

君不見管涔之水自北來砰訇喧逐萬壑雷靈邑孤城浸素漪絕  
若照耀金銀臺十萬人家枕汾潞水有蛟龍不敢怒蜿蜒三百會  
禹門誰其鎮之一石蹲人謂秋湍激浩渺邗茲蹲石一拳小峩峩  
太華尙可擘倘有怒貌愁扶倒偉哉造化真有靈靈鍾此石瑞千  
齡藐壺中之九華唾袖底之東溟體涵蒼翠而滴潤響越琳鍠而  
流馨儼若近空明之洞天兮君不見蜂房水渦脩磊乎嵌空而瓏  
玲嗟石之靈兮靈誰比未必媧皇能鍊此我疑神禹鑄向龍宮塞  
水脉不遺息壤長在彼相傳獲自仁壽年至今摩娑等銅仙城中



佳氣鬱葱龍城外驚濤空潺湲石乎石乎秀盤陀宜有松風耳後  
過分明海門龕楮立不才奈爾靈者何石果有靈聽我語勿但元  
精壓水浦化爲虹光萬丈貫斗牛人瑞之瑞瑞千秋

韓侯墓

杜元凱

邑人

風雨靈旗捲嶺雲漢家鼎定失元勳長陵至竟同坏土蔓草荒烟  
弔夕曛

李衛公祠

梁中興

邑人

謁岳氣猶壯逃楊路不窮爐圍汾水曲局定晉陽中海國揚帆槩  
真人佐命功廻思布衣日巾幗亦英雄

夏門春曉

梁中興

石氣青於染烟光面面同樓臺銜曉日桃柳醉春風山斷高林補  
河圍曲徑通憑欄時矚目人坐畫圖中

孝文山

曹士琳 邑人

疊嶂排青樹幾重山程曾此駐飛龍翠華日月留殘照紫塞風雲  
憶故封儉德不慚三代後精魂猶覺百靈從至今峻嶺遙相對輝  
映秦王馬跡峯

謁淮陰侯廟

曹文棣 邑人

領取微文太史書當年建策幾人如君侯非盡忘謙讓東嚮曾師  
李左車

李衛公祠

趙清綏 邑人

曠世英奇蹟未沈鬚眉巾幗意何深太原欲卜真人氣旅邸先回  
俠客心碁局於今勞揣度酒爐終古耐追尋依然祠宇臨汾曲憑  
弔西風付短吟

謁先賢卜子祠

曹文梓 邑人

轍環不到處吾道至今西俗自沿唐魏風遙接魯齊遺祠新灑掃  
下里舊羈栖一脈思言子江南雲樹迷

謁介廟次傅青主元韻

梁中簡 邑人

盤桓古蹟白雲週路入深林景色幽割股忠君型百代承顏孝母  
砭千秋蒼松翠柏標真節綠水青山繞故邱力挽綱常誰得似獨  
留明月照峯頭

介廟

教諭 劉衡詔 文水人

成功寵利只閑閑偕隱承顏在此間萬古不彫忠孝節歲寒松柏  
滿綿山

雨夜過韓侯嶺

張振緯 邑人

遠見山愁愁不醒嶺頭常爲護英靈心懸白日當空照秋帶甘霖  
徹夜零忠魄長留春草碧蜿旗高捲晚烟青平生樊灌終羞伍人

哭人歌弔驛亭

介子廟

楊齡芳 邑人

身將隱矣主恩偏旌善人猶思渺然綿上風煙傳一炬林間松柏  
已千年休言東海今無扇差勝西山尙有田至竟遺祠生客感豐  
碑題徧牡丹前

英雄奇遇祠

韓泰豐 邑人

有客萍縱合英雄勝槩留紅掀奇士髯青入美人眸促膝壚邊酒  
加餐革裏頭龍從河岳靜虎嘯海天秋昔過汾川壯今瞻古鎮幽  
眞王歸特識一劍各能酬

邑中八景一

霍州刺史 鄭 燧 貴州人

冷泉烟雨 灑灑溪澗鳴曉寒  
漆半臂煙昏小水河  
雨積大雲寺  
濃滋石蘚肥  
輕染遙峯翠  
此是冷泉關  
熱腸人亦至

翠峯聳秀 翠峯壓汾河叢木空際鎖路穿巖腹行空翠馬前墮

濃綠染衣襟選石山根坐須臾微風生飄來雲一朵

汾水鳴湍 水從管涔來奔向龍門去鏗作無射鳴怪石波心助

欲逐巨靈飛似共天吳語直過翠峯前又不知何處

介廟松濤 悲風自西來倏忽海濤作萬壑門蒼龍滿地翠雲落

謾謾凜人心造物司橐籥不同桃李花無言華灼灼

夏門春曉 曉到夏門村風輕寒料峭春困綠楊眠人共桃花笑

樓閣敞清華石磯坐垂釣竟日不能歸斜斜又晚照

蘇溪夜月 月掛東山巔水中橫藻荇大地光欲流倒浸竹柏影

我行到蘇溪真有如是景不見張懷民獨立溪頭冷

兩渡秋晴 秋色滿關中皎日照兩渡雲開天氣高渺渺飛鴻路

一水鎖長虹孤村繞紅樹搖鞭夕照中蟬聲嘶不住

霍山雪霽 大山宮小山小山瓜蔓似糞魁拔雲端積雪浮雲裡  
平岡走白龍尾捲汾河水韓侯嶺見之一片空明耳

邑中八景二

王志浩

冷泉烟雨 關雄三晉鎖峩巒峽束峯迴去路遙車轂臨流喧石  
齒人家陶穴住山腰濕雲垂野寒孤驛亂樹浮空帶小橋烟雨森  
疎重懷古紅衫青笠馬蕭蕭

翠峯聳秀 奇峯迤邐入雲端氣逼山城夏日寒嵐透飛霞紅有  
暈石含積雨綠成團烟中峻閣鐘飄渺樹杪遊人路曲盤最愛憑  
臨官舍近朝朝畫眼倚迴欄

汾水鳴湍 橫汾奔注抱山流激石爭喧小水頭雨過橋抽雙寺  
路月斜人靜一城秋蘆汀語雁隨更漏桃浪遊魚遠釣鉤幾曲紆  
迴天際去余懷渺渺郭西樓

介廟松濤 古廟蕭森仰昔賢喬松萬樹勢參天山靈猶笑文公

火父老常懷介子烟枝上吟看三代月聲中夢在五湖船承顏堂

外徘徊立聞說花開亦欲仙

廟有神花

夏門春曉 夏門樓閣枕雲湄小李將軍筆可追細雨濃螺花艷

艷微風輕燕柳垂垂山深猶想乘樵路水漲難尋峭壁碑烟外捲

簾吹玉笛春光如此付伊誰

山有唐碑水落方見

蘇溪夜月 小橋亂石聽鳴泉澄霽涼宵別有天雁影依僧高寺

月犬聲如豹遠村烟却思玉局同樽酒可是桃源問釣船更愛好

山青谷口松濤深處指綿田

谷口乃靜昇村介山一帶林巒極秀

兩渡秋晴 渡口秋風細雨零雲開斜照抹廻汀波穿樹裏雙流

急嵐滴橋頭兩縣青寒雁叫霜高閣迥沙鷗曝日小舟停村前偏

是紅塵路過客勞勞趁曉星

霍山雪霽 太岳崔巍積雪重雲開遠映夕陽濃瓊瑤草樹連羣  
岫金碧樓臺露一峯雉堞人家寒夜析驢綱行旅入烟鐘聳尊天  
半誰描畫彈粉王蒙寫岱宗

邑中八景三

王志瀛

冷泉烟雨 冷泉古關隘時平靜耕牧近山易成雨澗道淨如沐  
行旅著紅衫衝烟轉林麓

翠峯聳秀 岌嶻俯城闔危樓接青杳秀色日可餐白雲環窈窕  
石磴夕陽微僧歸烟樹杪

汾水鳴湍 橫汾千里波結屈石中過林臯夜清肅江湖幽夢破  
缺月挂女牆驚鴻飛個個

介廟松濤 子推神仙去虬松鬱幽嶺習習谷風生波濤鳴萬頃  
成連不可尋快哉陶宏景



夏門春曉 兩山儼一門開闢自神禹樓臺屹飛動桃花滿村隴  
恍到天台山不數武陵浦

蘇溪夜月 何事名蘇溪赤壁景差肖長坂樹扶疎泉聲激清妙  
山高明月來東坡有詩料

兩渡秋晴 一水須兩渡隔溪林屋對石梁秋水深莊惠凡幾輩  
空翠夕陽明衣袂染輕黛

霍山雪霽 霍岳亘數邑韓嶺當奇勝瑞雪積春秋林表金碧映  
吐納蘊元機北方資玉鎮

邑中八景 四

孫貽謨

冷泉烟雨 泉水極清冷雄關倚驛亭樹交烟蔽綠山近雨留青  
瘦馬勞登陟高鴻任杳冥廿年塵土客此地百回經

翠峯聳秀 郭外開青嶂牕中見翠巒雜花香帶雨新月澹依山

雲石縣志卷之十一  
八十一  
傑閣凌霄漢孤筇任往還曉來雲出岫秀色有無間

汾水鳴湍 積石遏奔流聲疑嘯虎彪聽難安客枕深亦礙方舟  
馬首瞻殘照山腰簇畫樓幾人凭檻立消受水天秋

介廟松濤 試看松萬樹都歷幾千霜豈有焚林事傳聞屬渺茫  
搏風疑作浪結子盡成行夜識蒼龍臥波濤自莽滄

夏門春曉 一帶山環翠三篙水潑藍柳眉顰漸展桃靨粉猶含  
曉露沾衣重春風着面酣呢喃雙語燕景物似江南

蘇溪夜月 何地無明月偏宜此處看三人邀影對雙鏡倚波寒  
夜靜心因靜更闌興未闌僧寮循小檻數遍竹千竿

兩渡秋晴 一艇橫秋水千林奪綺霞鴈傳遙浦字菊賸短籬花  
古道聯行旅前山起暮鴉渡頭尋蟹斲村店酒旗斜

霍山雪霽 憑高瞻霍鎮瑞雪積千重凍樹壓將折寒雲染更濃

冰壺應比潔玉檢昔曾封改歲春風到青波慰大農

邑中八景 五

曹文棣

冷泉烟雨 驛路飛烟雨關門入畫圖雲涵雙塔迥峯轉一川紆  
驢背駝紅笠犍蹄飯綠蕪瑄瑄石壑林籟共笙竽

翠峯聳秀 秀色難爲狀峇嶷聳一峯雲屏橫遠翠烟樹鬱奇穠  
風盪星光碎川涵練影重借題供奉句削出金芙蓉

汾水鳴湍 面面壓長蛟環成浸水梢雷霆喧北浦風雨送東郊  
遠寺鳴鯨籟高松警鶴巢別揮清淨理憂石譜笙匏

介廟松濤 忽湧靈旗出松濤遠近聞千章森冷翠萬纛捲蒼雲  
林動風疑雨山高日易曛橫琴未終曲霜葉落紛紛

夏門春曉 一門開石壁春入武陵中山閣渾無路溪橋忽跨虹  
烟消汾岸北日暖畫樓東桃柳年年事風光迥不同

蘇溪夜月 一樣尋常月蘇溪濯倍清賦心叅鶴夢禪諦入鷗盟  
影動樓臺出光分草樹明松風隣介廟吟賞徹巖更

兩渡秋晴 霽日照芳洲行人古渡頭鐘疎孤寺曉雨歇一帆秋  
蘭菊懷新賞瀟湘擬勝遊畫橋渾小立靜意數眠鷗

霍山雪霽 層巒面面封雪後現奇峯霽色明林表嵐光豁客蹤  
寒生汾水闊晴散嶺雲濃試問瑤臺月仙居此幾重

邑中八景 六

杜先華 邑人

冷泉烟雨 誰潑蒼烟染碧岑古川關口雨蕭森輕綃淡抹千家  
白杏靄濃添萬木陰南寺鐘聲雲外度東池泉味雪中尋戍樓遺  
堞淪荒草十里離離夕照沉

翠峯聳秀 天然削出玉芙蓉紫陌紅塵未許封傑閣烘丹凌峭  
壁疎林疊翠聳奇峯暮濤低捲汾聲壯曉霧高涵石氣濃放眼最

宜唯九日憑欄凝眺豁心胸

汾水鳴湍 汾水流澌幾處同獨傳此地響淙淙蛟龍夜吼危灘  
月雷雨秋號落水風譙鼓齊喧城左右寺鐘疎度峽西東不知誰  
作迴瀾手瑞石亭邊想像中

介廟松濤 萬派蒼松忌坂幽晉時高隱宋封侯林搖黛影濃如  
洗地捲濤聲翠欲流夜雨龍蛇吟巨壑秋風烏鵲噪長楸繞烟臺  
畔無尋處終古青山任去留

夏門春曉 嫩柳垂金兩岸遙夏門春色簇山腰屏開峻嶺羊腸  
路帶東清汾雁齒橋日暖園林宜對酒香薰臺榭欲吹簫芳鄰應  
接西河近處處絃歌出絳綃

蘇溪夜月 十里長溪尺五天輕雲高卸桂華鮮綠隄樹木壺中  
現近水樓臺鏡裏懸玉宇朗開千壽寺金波寒徹數峯巔偶從瀾

上閒吟過萬杵秋聲畫閣前

兩渡秋晴 北來高阜豁雙溪傍水烟家枕岸齊山色平分蒼靄  
斷汾流斜繞暮雲低橋邊霜落迷人跡渡口花明趁馬蹄放出秋  
光惟夜月清輝遙度亂峯西

霍山雪霽 峭削峯稜萬仞盤天公玉戲昔曾看洞開林表雲容  
霽朗入巖扉日色寒鷹隼遙尖凌健翮輪蹄隔嶺冷征鞍琪花瑤  
草知多少認作蓬萊海上觀

翠峯聳秀

任秉德 壺關人

奇峯矗立碧雲端萬丈誰將彩筆干星動奎垣秋色朗月涵汾瀨  
鏡光寒畫屏雨後青於染瑤草春來秀可餐最羨鵬鵬盤遠勢風  
烟翹首獨憑欄

夏門春曉

薛秉經 襄陵人

夏門奇峭俯雲湄  
王宰丹青未可追  
日晃亭臺春水抱  
烟開楊柳酒帘垂  
蒼苔點壁藏幽徑  
怪石沿灘護斷碑  
我過小橋尋古蹟  
唐賢去後語伊誰

兩渡秋晴

薛秉經

高秋葉落響長亭  
渡口斜陽淡遠汀  
兩岸橋分雙水白  
千家烟聚一山青  
驚寒塞雁霜初降  
趁曉沙鷗雨乍停  
筆落太行人不見  
蒼

茫雲樹憶文星

謂何蘭士

汾水鳴湍

任守禮

邑人

潺潺亂石下灘頭  
日夜清汾不斷流  
橋外影搖千礪月  
山邊響徹一林秋  
行斜遠浦驚寒雁  
夢醒閒汀起白鷗  
却憶沙平草軟處  
幾曾垂釣泛漁舟

冷泉烟雨

李蔚華

邑人

峭壁懸崖亂翠飄，冷泉關口路迢遙。  
一帘花影迷茅店，兩岸波光帶柳條。  
薄暮人家烟澹澹，凌晨行旅雨蕭蕭。  
蒼茫死入天然畫，草笠芒鞋過野橋。

七月十四日偕黃次臯孫蘭垞家兄千波小集觀瀾亭聯句

二首

王志瀾

絕壁敞孤亭

次臯

提壺此乍經

千波

捫蘿循曲磴

蘭垞

聽水倚疎

櫺樹擁溪雲

綠幼海

山連寒雨青

千波

西風鳴蟋蟀，塵夢片時醒。

蘭垞

共是塵勞客

幼海

偏來醉碧山

千波

雁聲天地闊

幼海

僧梵水雲

閒

次臯

小榭留殘照

蘭垞

深杯駐昔顏

幼海

迢迢烟壑暝，高詠不

知還

次臯

介子推偕母隱

二首

何杏雲



交友從君往事違登堂拜母告兒歸  
兒歸無恙身將隱不向人間問是非

山中風景堪娛目肯學貪功去求祿  
願母重加顧復恩與兒同享山中福

綿山道中望介林

茹綸常

介休人

躡屐綿山巔翠然肆遐眺鬱鬱介林松  
煙霧半縹緲瀾漫氣自適陰森青未了  
遲徊意不盡鐘聲出林表

介林

茹綸常

介公抱奇節棲隱誰能同畢命無少悔  
寧復歌蛇龍咄彼狐趙輩乃竟貪天功  
我行過忌坂懷古思安窮迄今綿上田  
猶爲頑懦風林深禁火餘祠古寒煙空

冷泉關道中

茹綸常

靈石縣志 卷之一  
八十五  
落葉關南道衰遲感易生秋聲汾曲冷山色夕陽橫塲圃看新築  
輪蹄憶遠征蘇門有高咏望古一含情

竹林王公崇祀孝義祠

公工書法

茹綸常

光昭祀典著清譽積善眞看慶有餘叢竹只今生孟筭淵泉自昔  
湧江魚非關市義纒焚券尙憶臨池爲學書見說石膏山下路高  
風爭仰鄭公廬

望冷泉關

山西布政使

羅繞典

安化人

冠爵津前路晨曦望藹然翠飛山頂霧冷湫石根泉細草香縈磴  
甘棠蔭拂天時和爭訟息雀鼠谷誰穿

韓侯嶺

二首

羅繞典

難得君王布赤誠千秋國士豈虛生縛雞力瘁烏騅逝逐鹿功成  
走狗烹信本無雙存定論噲羞爲伍誤浮名萋萋芳草王孫去潮

打韓江恨未平

函首西來一騎飛軍門曾否淚沾衣謀成閩內將軍困策定關中  
往事非英主未應妨大度故人空復識生幾祇今秦漢都歸盡坏  
土荒涼嘆落暉

雨後策馬宿仁義鎮

羅繞典

韓侯嶺下夕照微韓侯嶺上濃雲飛山腰一雨僕夫躓欲上不上  
愁崔嵬千推百挽到山脊削壁俯視真危機旣無間道馳竟成背  
水陣侯兮侯兮策誰進乘我馬兮蹶復振一鞭汗血飛千仞手持  
鞚兮目難瞬路逾險兮馬逾駿一落千丈兮失雄峻花蹶竟蹋仁  
義鎮解我衣兮浩歌幸策我馬兮無蹉跎世途雖險兮加我何韓  
侯不見見應笑畢竟成功險處多

逍遙嶺

羅繞典

靈石縣志 卷之十 八十六  
岳陽東望溼雲生馬上看山眼倍清山脚日光山頂雨陰晴一綫  
界分明

淮陰侯 二首

邑令謝

均

涿州人

莫笑王孫胯下過知人原賴鄼侯何一軍驚後三秦定百戰贏來  
四面歌要靖楚氛安億兆思酬漢德統山河當年若少無雙士縱  
有蕭張未足多

緜雲霍雪列西東大將英靈在此中赤幟勳名成往事青山食報  
正無窮野雞性毒聽讒口汗馬身勞識匪躬廟貌年來新補葺捐  
廉聊以荷神功

淮陰侯祠 二首

謝

淇

涿州人

話到淮陰世事危功高震主惹猜疑而今炎鼎歸何處國士名留  
萬古祠

莫談鳥盡恨弓藏大將安危繫上蒼寸土埋身亦主惠千秋知己屬高皇

庚午秋登翠峯山文昌閣

四首

謝淇

翠峯山倚軟橋東初上如無路可通雲樹豁然生動處文昌閣在夕陽中

不聞人語但聞鐘知在前山第幾重漫步登臨回首望頓教萬慮隔塵蹤

玲瓏簷鐸時聞聲汾水綿山檻外橫一覽羣峯明滅際炊煙起處是荒城

溟濛難辨月將升去向禪房別老僧爲說菩提渾不覺歸來初上兩三燈

淮陰侯祠

二首

王如玉 邑人

爭衡楚漢氣難降  
天使將軍助漢王  
決勝施奇成底事  
卻教烏盡恨弓藏

獨擅神功第一流  
殊恩雖重已全酬  
劉郎老去王孫杳  
衰草寒煙半惹愁

英雄奇遇圖

王如玉

我觀春秋大復讐  
匿怨不報生含羞  
安得蚪髯三尺鐵  
重殲忘義清神州  
我怪塵世多矇昧  
特識往往在女子  
可憐紅拂今已死  
英雄埋沒東流水  
是誰俠氣凌穹穹  
蒼華顛落落追林  
荒感此殷勤寫尺幅  
欲假豪素呈剛腸  
柳陰茅店日西薄  
劍光搖動勢欲躍  
今我展玩轉淒蹙  
聊作長歌以當哭  
試飲圖中酒爲舞  
圖中劍酒酣舞罷  
目如電公孫若在  
應稱善

靈石歌

何慶瀾

邑人

人於萬物爲最靈四靈亦載大戴經自古最頑莫如石生公說法  
幾曾聽鑿鑿雲根埋洞壑稜稜山骨瘦回淳蒼苔碧蘚湮其形有  
隋開皇之十載文帝曾此駐雲駟彼汾一方開遠道石破天驚走  
雷霆不待雷穿不待削混沌鑿來何瓏玲有如鐵之黑有如銅之  
青撫之光潤玉叩之聲和鈴大道永吉字蒼古彷彿禹鼎湯盤銘  
萬古靈氣一發洩層雲宿霧不能局乃知石靈即地靈壯以城與  
市接以郊與垌藏以七尺屋一面透疏樛鬼神爲呵護日月助晶  
瑩新碑舊碣相陪立風雨不敢來飄零突兀崢嶸成砥柱河汾無  
患千餘齡君不見李廣射虎亦小技初平叱羊歸杳冥補天幾見  
媧皇煉支機誰問鵲橋星此石屹然自終古不磨不滅千秋型左  
接綿峯右霍嶺鼎峙百里列雲屏永固門外訪遺蹟摩挲拂拭幾  
曾停試學米老一再拜靈光萬丈生碑亭安得袖中有東海磨礪

癡頑傲五丁

汾曲觀釣 二首

何慶瀾

山光倒影岸難遮把釣人來水一涯  
滿水亂山流不去游魚棄餌  
暖山花

岸闊魚稀水色虛小橋竿影夕陽餘  
柳絲也學人垂釣垂向橋邊  
不爲魚

介子祠

何慶瀾

不有高賢寄足音誰知此處好山林  
陶潛罷職歸來早屈子行吟  
怨思深五霸假仁空小惠一家全節有同心  
侯封莫惜存虛位十  
里松濤宿衛森

子夏廟

何慶瀾

彬彬文學並言游豈獨葩經小序留  
半世著書居石室一時受教



有文侯當年莒父功名薄此日祠堂繪事修  
干木子方今在否西河遺像自千秋

韓侯嶺

何慶瀾

漂母千金報不虛漢家推解豈忘諸登壇早佩眞王印拜將先留  
國士譽相背兩言辭荆徹囊沙一計斬龍且最憐背水歸來日餘  
勇猶思募左車

孝文山

何慶瀾

遺跡曾傳漢太宗山頭小憩亦萍蹤力田未下西京詔守土先辭  
代北封路指殺函聊駐馬雲隨平勃學從龍到來憑眺應回首風  
景何如過雁峯

秦王嶺

何慶瀾

席捲亡隋定四方誰將此嶺付秦王半村山勢吞函谷一片龍旂

出晉陽石佛自依青嶂側  
霍神相話白雲鄉  
老生漫築峯前寨  
枉與唐家作虎狼

衛公祠

何慶瀾

祠宇巍然鎮水頭  
英雄曾此訂交游  
美人俊眼青於鏡  
奇士長髯赤似虬  
氣懷岳靈書一紙  
踪逢萍水話千秋  
有情眷屬知心友  
同把三生夙願酬

清涼寺和縣尊蕭公韻

趙常餘  
邑人

高空殿宇跨巖疆  
古砌尋碑折屐忘  
佛座經聲宣妙諦  
禪房花影足清涼  
人傳張果仙蹤杳  
畫仿吳生墨跡香  
借問金山蘇玉局  
願從寶筏得津梁

冷泉道中

閔秀渾  
湘  
毘陵人

汾曲晚晴開  
行行古驛來  
夕陽描短晝  
微雨壓飛埃  
風定蝶猶舞

葉稀蟬獨哀山腰懸列屋人儼在春臺

咏韓侯

進士趙子璨 邑人

我挹韓侯墓侯墓草萋萋我挹韓侯廟侯廟遍題詩侯功莫與爭  
侯心誰與知能令千載下想像有餘思

韓侯祠

庠生裴其章 邑人

韓侯今已矣巋然廟貌隆千秋溯遺迹萬古思英風乞食憐漂母  
懷才謁沛公誰知勝下者一旦登元戎背水壓趙壁連營驅楚瞳  
三齊笑談裏九里指揮中汗簡表勛業淮陰紀首功高帝北征去  
飲恨未央宮

過淮陰侯祠

庠生裴其章 邑人

漢主江山久已空韓侯廟貌尙尊崇嶺頭勒馬閒評論細說淮陰  
破楚功

韓侯頌懷古

庠生 裴其章 邑人

行來嶺上日欲晡蕭疏村落烟糝糊祠宇荒涼蒼松裏韓侯墓頂  
白草鋪凝雲漠漠愁欲雪嘶馬蕭蕭如惜別淮陰智謀千古高至  
今空留行人說英雄飄忽如飛灰功人功狗同莓苔當年事業竟  
何有靈旗風嘯還增哀中原自古嗟逐鹿烏盡弓藏堪共哭可惜  
此機侯不明留侯自喜能辟穀

兩渡秋晴

閨秀 何杏雲 邑人

西山爽氣挹無邊况是新晴雨後天佳景雖多何足數秋收先喜  
是豐年

宿介林山樓聽松濤歌

庠生 裴其章 邑人

幽禽寂寂空林秋僧人宿我山中樓繩床輾轉不成寐但覺耳畔  
聲颼颼初疑驟雨打窗紙蕭蕭颯颯差可擬又是江海捲風潮恍

然身臥海帆裏須臾枕簟生虛寒披衣起坐推窗看滿山  
蒼鬱空瀾漫半輪新月懸林端

英雄祠紅拂女

翰林院編修何福堃 邑人

忌刻無如楊越公不辭跋涉賦秋風郵亭得遇虬髯客  
燕頷蛾眉一笑中

介子推祠

翰林院編修何福堃 邑人

介推綿上去富貴若浮雲懿訓承賢母清風表晉文  
屋橫喬木影袍染牡丹芬我與公同里私心仰企殷

癸巳重陽日陪族叔仲嘉族兄一山遊文昌閣有懷

陳鶴年 邑人

一天烟靄晝濛濛此日登臨興亦雄千點亂山雲影外  
四圍荒樹雨聲中龍山落帽懷前約雁陣驚寒人遠空  
秋水伊人何處所黃

花折寄欲臨風

濛濛細雨欲霑衣  
瞥眼韶華序已非  
萬里風雲遲際會  
三生萍梗夢依稀  
好將詩思酬紅友  
無限秋光繞翠微  
往事不堪迴首憶  
黃花且插滿頭歸

春郊即事

陳鶴年 邑人

淡雲微雨冶春遲  
楊柳千條盡踈絲  
一樣靈和烟露種  
可憐風度減當時

隔岸人家白板扉  
遙山黛染碧成圍  
最憐弱柳長堤外  
踈地輕陰燕子飛

筍笠芒鞋得得行  
臨流顧影可憐生  
杏花寒食東風路  
便乞荆關畫未成

春聲幾日動微茫  
省識郊原力作忙  
看到嫩黃千萬頃  
名花爭似

菜花香

綿山潔惠侯祠 四首

恩貢生 田萬棠 邑人

山光烈烈汾流東潔惠古祠德望崇本是從亡避國難詎能隨衆  
貪天功乘輿復蹕君恩報巖穴棲身母志同禁火相傳百五日萬  
家寒食綿田中

潔身去國原無因甘匿空山作逸民千載典型傳赫赫一堂孝友  
樂恂恂風梳雨洗松濤秀春報秋酬俎豆新香火至今猶不絕堪  
羞疇昔爭功人

旌善煌煌殊典頒奈何後世說焚山霸君餘烈今何在義士流風  
終不刪介節無庸俗客賞高標祇許騷人攀牡丹恰向堦前植好  
使天香撲紫顏

山麓平洲古蹟傳忠臣食報享綿田承顏遺跡爾憑弔封股苦衷

誰見隣隱逸直居巢許上風徽不數趙狐先  
自來富貴浮雲視何必繁華在眼前

和某縣長

民國十八年邑境不寧調某來靈  
辦理剿匪以詩寄贈因和韻三首

耿步蟾

邑人

跳梁小醜靖無期誰信書生足救時  
卻喜岳陽狼戾息頻驚夏縣  
虎賁馳班荆何幸來高足借寇應知仗宿耆  
自是長才羈短馭牛刀左右詠宜之

梓鄉烽燧起無端良吏風徽自可觀  
一木詎堪支大廈中流深幸  
拯狂瀾民安方見官聲好賊救才知行路難  
壁重連城君信是新詩更覺耐人看

實心爲政勝權奇寬猛相調妙轉移  
俗化強梁龔勃海人高節讓  
鄭當時一行作吏應如此三月清鄉更有誰  
驥足漫愁無日展鴻毛會遇順風吹



耿公耀彩輓詩十六首

太原府府學教授  
授戊子科舉人  
韓 垌  
洪洞人

年來耆舊感彫零  
晉北并南見典型  
道美里中遺跡在  
宅邊五柳尚青青

當代宗工王可莊  
芹宮高擷姓名香  
龍門聲價空十倍  
虛願徒存竟莫償

前程詎忍付蹉跎  
族大丁繁可奈何  
何事米鹽皆井井  
自來齋白受辛多

模範一家復一村  
村規整肅近猶存  
風行六政從新革  
和氣奚祇在一門

九鼎由來重一言  
仲連高誼萬人傳  
山村絕少追呼吏  
屈指於今三十年

縣西村落傍汾流  
水涸時爲居室憂  
不向上台求放水  
安能飲濯

自優遊

石曲灘頭舊草橋夏時病涉水迢迢苦心建築石樑後滅頂凶災  
自此消

橋道功成復鑿池池成蓄水利堪資無須秉筆更爲記萬口宣傳  
即是碑

各鄉小學已如林道美如何不嗣音憶自苦心提倡後於今桃李  
已成陰

十年樹木計如何楊柳桐榆植已多更愛後彫還植柏參天美蔭  
足婆娑

師門高誼不能忘子息猶虛信可傷代覓阿嬌藏金屋從茲繞膝  
有兒郎

實業莫如作卅人晉民生計此爲津教兒西渡學成後富國從茲

種夙因

蘇溪道美有宗祠石櫃移居獨缺之寢廟新成虔奉祠蒸嘗百世  
禮無虧

猶憶庚申歲荐飢嗷鴻遍野集窮黎救災雖乏回天力忍視蒼生  
若望霓

教導兒孫有義方蘭芬桂馥盡名揚古稀已過人增健合祝期頤  
永壽康

木壞山頽可奈何哲人其萎淚痕多愧無椽筆爲銘誄聊進靈前  
薤露歌

瑞石

楊獻箴 邑人

有隋開皇幸汾府沿河繫道運斤斧驀地飛來石崎嶇玲瓏透剔  
堪摩撫似鐵非鐵亦非金擊之如磬復如琴天然有文書永吉迤

灑豎之何森森嗟爾石本冥頑者峻嶒劣崩而況且媧皇雖煉天  
雖補有無真偽誰辨也此乃地靈生石靈舜有鳳儀堯有瑩石今  
兆及千秋瑞蔚起人文播芳馨護以亭臺與廊廡面有翠峯背有  
浦翠峯之秀秀無雙鍾靈毓秀成千古

西鄉田家山八景竹枝詞

廩膳生員 張象舒 邑人

環山如帶

當村一覽四圍山拱立如屏繞似環聚氣藏風稱

淑地常年對景樂幽閒

高峯近天

天近峯頭峻接天仙人遺蹟久相傳

相傳為仙人  
張果坐化地

余宗借此鍾靈秀百世安居永不遷

墳中異木

老墳中有  
元朝碑

六百春秋紀舊瑩登墳之樹特殊名

墳中有  
樹村人

名爲  
登墳後人莫許輕樵採應曉奇材不偶生

石上清泉

石磴湧泉汨汨鳴衡門泌水遜其清臨流方覺多

幽雅下段飲牛上濯纓

俗名飲牛河

老槐夏午

森森密密古槐陰  
赤日中天暑不侵  
飯後乘涼來

小憩幾人對坐好談心

古寺晨鐘

古寺高居天近峯  
老僧到曉即鳴鐘  
誰家睡在聞

聲後大眾同嗤是惰農

爐溝石櫨

西南上溯鍊爐溝  
石壁之中異跡留  
數丈櫨樑崖

外露不知內有幾間樓

河畔石龍

由村而下水流東  
河畔高崖氣象雄  
不知何時龍

見此石中尙見爪留鴻

過韓侯嶺

耿步蟾

邑人

吁嗟乎專制流毒何其酷  
功臣十九遭誅戮  
烏喙寡恩文種亡梟  
雄負德韓侯族韓侯之嶺  
高嵒巖上有侯墓  
前行宮我昔過此必

靈石縣志 卷之十一 九十五  
入拜肅然遺像生寒風漢家帝業基侯手微侯未必歸漢有祇因  
明哲輸留侯致令鐘室丁陽九劉季雄猜千古無司晨更有呂雉  
奴彭王菹醢淮陰僂英雄血淚交糝糊獨怪爾時蕭相國竟將談  
笑恣羅織上以刻毒下詭隨君臣居然同一德我欲持之問眞宰  
忠魂萬古今安在不見長陵土一坏唯見侯廟丹青常不改

夏門百尺樓

耿步蟾

君不聞始皇建築阿房宮驪山複道盤虛空離宮別館不知數楚  
人一炬咸陽紅又不見石崇之園號金谷珊瑚玉樹森盈屋綠珠  
一墜繁華盡香魂散作秋籬菊靈石奇景數夏門神禹疏鑿功猶  
存汾水爭趨雀鼠谷桃花疑入武陵源村有梁氏邑名流文采風  
華孰與儔不誇蔣詡三弓徑更仿元龍百尺樓嘉道咸同最盛時  
鴻儒碩彥相追隨有客獨酣元亮酒無人不解少陵詩嗚呼盛衰

常倚伏塞翁失馬焉知福君相豪奢有盡時士民服食應知足斯  
樓位在汾西岸登臨頓覺紅塵斷照碑灘水自年年歸雁亭雲復  
旦旦否泰循環理自然底須搔首問青天樓下行人嗟月落樓頭  
皓月向人圓

靈石歌

耿步蟾

媧皇鍊石曾補天此石出自開皇年大道永吉字磨滅後人詠者  
徒紛然我觀此石赤鐵礦標本天然人未省鐵之成分約六五

鐵含

質在百分之六十五以上

含有砂質蒼苔冷周禮井人久失官因以名縣意深

永爲問靈石石何靈叩之聲作錚錚鳴高將及尋周倍之似石非  
石何亭亭汾水自昔常爲災以石鎮之安城隈或云此說近神話  
片石何與汾駘臺我今作歌非紀異要探寶藏發幽秘一卷之石  
歷滄桑當年來脈知何自繫誰測驗覓礦源吾邑從此興實利

四百歲團公讌詩讀馮賈二君作奉和

有序

耿步蟾

癸酉冬初李君綱卿議集壽團年五旬者八人為四百歲團東邀綏省兩府諸公及各界名流公讌於山西飯店越日諸

公還席相酬馮君振邦即席賦謝賈公煜如仿老杜飲中八仙歌題詞予時因實業廳辦理十年建設提倡種植棉菸親

赴晉南臨汾曲沃一帶視察便道返靈與縣長李凱朋暨邑紳等籌商本縣建設及重修縣志諸事宜是以未與斯盛歸

後因親二君作勉為奉和八人者南君佩蘭馮君振邦李君綱卿王君猷丞劉君寶華常君子成予及王君監先也

蘭亭雅集桃園宴耆英盛會人爭羨青年壽團今老年五十光陰

如石電鳥乎壽團何所壽丈夫當具三不朽王陽明與曾湘鄉德

業文章照前後此時蟹肥菊正黃臨汾未解歸來裝似聞茲會德

星聚主客五十人猶強就中瀟灑推老南好客情勝桃花潭白水

盟心見道性明珠唾口饒雄談綱卿叔議招回儕冠裳濟濟瓊筵

開汾酒河魚雜珍錯藏鈎拇戰忘形骸猷丞李馮三校長同舟共

濟王恭肇公門桃李灼春華大庇歡顏厦自廣常劉教育着先鞭



海外裴航數監先更喜玲瓏兩掌珠金陵奪得錦標鮮興酣筆舞  
天放生一篇脫稿神鬼驚韜園作歌宗少陵老氣直與秋天橫四  
百歲團世所稀八人五裴欣同庚我欲和之慙弄斧當前國難將  
誰補區區人壽何足多百年轉瞬成今古三晉名流共詠觴兩番  
公讌相賓主惟有茲團庶不泯斯文留與後人撫

介廟楹聯

何慶瀾 邑人

百五日曾行禁火 奈焚山究屬傳訛 左氏之書不載  
十九年相與從亡 待遯跡始蒙旌書 晉文之譎可知

重修太原鼓樓楹聯

耿步蟾 邑人

民國二十二年春造產救國社同人爲倡倡土貨促進建設  
起見籌貲重修太原鼓樓以作土貨陳列館本年十月工竣  
並徵集晉綏各處土產開晉綏物產競賽會會畢即成立陳  
列館因余擔任品評主任工作謹贈聯句懸諸樓前

百尺快登臨 近矚井汾 遠瞻包固 山川孕育 歷歷如數

靈石縣志 卷之十一  
家珍 十年建設此開端 要喚醒晉綏兩省人民 努力齊心  
搗造產

羣倫資景仰 藏興煤鐵 利盡魚鹽 水陸交通 紛紛畢獻

方物 萬寶告成爭煥彩 待振起唐虞三代文化 耕田鑿井

慶同風

天地文而萬物賁賁之時義大矣哉君子讀易至賁得文象  
焉夫賁之爲體內離文明也外艮篤實也始於賁而終於白  
所謂至色生於無色至文生於無文乘乎不已之機定以必  
止之分卷之則退藏於密放之則彌淪六合所由文明以止  
而馴致乎化成之效也乎遵是道也士之禔躬亦然自下學  
以至上達蒙而養焉兌而說焉離而照焉謙而受焉頰履頰  
復而敦復焉則德日新矣日新則光輝生所謂文也光輝之

至歛爲篤實所謂止也士以此禔躬即以此學文然君子先  
器識而後文藝器識不立雖雕龍吐鳳其筌蹄也揚葩採藻  
其渣滓也文不外日用倫常之中果其內以慈劫其心外以  
砥礪其行則文於國忠敬是也文於家孝弟是也文於鄉閭  
禮讓是也文於閨闈貞節是也文於交際往來信義是也文  
達於上則本其所學和其聲以鳴盛文見於下則發情止義  
肫然可泣而可歌文之不可已也如是而葩言僞體不與焉  
夫典謨之賡歌風雅之遺文固夙乎弗可尙矣其自漢魏唐  
宋以來名公鉅卿高文典冊凡所以扶翼經傳潤色鴻業者  
並足昭垂於不朽以供後世之考證焉逮我 朝稽古右  
文 文治之隆超邁千古海內之鱗集仰流思共鼓吹

休明者固已蒸蒸日上倘非所謂觀乎人文而天下化成者

與靈雖小邑亦有文獻焉於是集藝文爲一卷庶幾有合於  
賁之義乎存之以備後之採擇亦不無少補云爾

邑志者志與本邑有關係之事也兼志其地與人可謂周詳  
矣然志所未及者又以文傳之而其事其地其人亦因之以  
俱傳顧可輕忽視之乎舊志原本與續修兩編藝文志中分  
記詩二類計有記辨頌禁令墓誌碑記等二十餘篇詩歌等  
一百數十首茲復擇其有關政要及邑故者採集碑記碑文  
墓誌銘等十餘篇詩詞歌數十首楹聯數副以類相從都爲

一卷俾資風采而備觀覽云

民國二十三年重修記